



知守齋集

五

墓誌  
墓碣

~ 16  
2381  
5





知守齋  
2381  
卷八

知守齋集卷之九目錄



墓碣

軍資監僉正贈左承旨俞公 大偁 墓碣銘 並序

副護軍贈戶曹參判金公 錫範 墓碣銘 並序

全羅右道水軍節度使申公 命尹 墓碣銘 並序

陽城縣監金公 泰壽 墓碣銘 並序

江原道觀察使韓公 重熙 墓碣銘 並序

慶尙道觀察使贈吏曹參判南公 正重 墓碣銘

並序

成均進士贈議政府左贊成金公 道泳 墓碣銘



并序

殷栗縣監贈吏曹參判金公

盛道

墓碣銘

並序

工曹參判申公

光夏

墓碣銘

並序

旌善郡守洪君

啓欽

墓碣銘

并序

成均進士贈吏曹參判朴公

興源

墓碣銘

并序

清道郡守李公

顯行

墓碣銘

并序

同副承旨李公

士祥

墓碣銘

掌樂院正贈吏曹參判宋公

炳夏

墓碣銘

并序

司諫院大司諫洪公

聖輔

墓碣銘

并序

金城縣令李公

英輔

墓碣銘

并序

信川郡守李公

世會

墓碣銘

並序

弘文館應教申公

哲

墓碣銘

並序

忠勲府都事贈吏曹參議李公

週

墓碣銘

並序

司諫院大司諫李公


濟遠

墓碣銘

並序

漢陰老人自銘





知守齋集卷之九

墓碣

軍資監僉正贈左承旨俞公墓碣銘 並序

公諱大稱字景宣始祖俞三宰仕新羅爲阿飡有諱  
義臣麗祖代羅不肯屈降屬杞溪縣戶長子孫遂爲  
杞溪人自後冠冕蟬聯入我朝諱起昌僉知中樞  
府事是爲公高祖僉樞生諱汝霖禮曹判書諡景安  
景安生諱絳戶曹判書諡肅敏是爲公會祖祖考考  
諱涵成均進士贈左贊成出爲肅敏兄府使諱縝之  
子妣平昌李氏郡守希賢女以嘉靖乙丑生公萬曆





癸卯中司馬游泮宮見推士友以薦除慶基殿參  
奉未幾免值光海昏亂公杜門絕意進取仁祖改  
玉復仕爲司饗院參奉歷尙衣院別坐內資寺主簿  
通禮院引儀平市署令至軍資監僉正卒於崇禎甲  
戌五月十五日享年七十配清州韓氏判官漪之女  
清原尉景祿之孫端莊溫惠內則咸備生後公二歲  
沒後公四歲合窆于扶餘咸陽里已向之原有二男  
長得會縣監次勗會四女婿寺正趙希進校理柳韓  
縣監柳廷禹牧使閔晉亮側室三男晚會敏會順會  
縣監一男曰標有男命賢及三女勗會三男權植禱

二女適同知李百祥縣監柳翊漢權無子以禱之子  
命集爲後植一男一女男命舉禱三男命集命燮命  
楫內外會玄多未盡記公幼而嶷然器度老成服膺  
嚴訓無少懈贊成公奇愛之婦家素豪貴粧奩資送  
頗侈厚公澹然如不見也性坦夷無畦畛人莫不親  
愛之咸歸以長者丁憂廬墓盡禮事諸兄務誠敬爲  
文詞蔚有理致不尙雕篆屢占解額而竟不第嘗赴  
試將拆號人有亟報者曰公中第俄又報曰幾中而  
不中賀未畢而唁者至公猶然不置意曰鄙文荒拙  
不中宜矣蓋公之妹婿沈相國悅適掌試以嫌拔去



非文之咎也人尤惜之公少嘗因事至湖庄適土賊李夢鶴猖獗爲亂人多惟勸公獨挺身爲邑宰設方略俾卽殲討錄其勞追贈承政院左承旨韓氏從贈淑夫人公沒已百年而墓未有顯刻公之曾孫命集命賢氏以拓基爲贊成公之兄郡守諱泳之五世孫屬以阡碣辭不獲謹就遺狀彙括其大者如此系以銘銘曰

時之溷乎守吾貞世之難兮效吾誠壽考寬樂沒吾寧有如不信眎吾銘

副護軍贈戶曹參判金公墓碣銘

並序

今 上五年夏有司奏前郡守金相斗有五男俱中武科請加資歲賜米如例 上可之於是金侯自通政進二品階推恩贈其考護軍公諱錫範爲嘉善大夫戶曹參判其妣邊氏親受貞夫人封誥一世摺紳大夫士莫不爲之艷歎旣又曰是不寧金侯爲多福抑其先之蓄德儲祉贏于躬而于後食之歟是足以觀天道也金侯累官爲水軍節度使將樹石于參判公墓而要丕佞文之公字汝疇安山人天姿豪宕器度魁梧自幼已傑然有食牛氣事親極其誠與昆弟友悌接人應物亦一以忠厚任真無華不設表襮見



人窮無賴竭力以濟之雖傾困廩無恠色無疎戚靡不飲德而慕悅焉視世之齷齪便嫺飾邊幅者恥之如浼有時抵掌劇談旁若無人又或牢籠顛倒使人不測其涯畔農巖金公已已後寓近里時火色滔天人皆掉臂而去之公獨不少沮親厚如骨肉農巖詩之曰平生好心事於我特深眷躬耕氣不低痛快靡婉變此可以見公矣公早投筆業武丙辰登第偶病贖遂絕意進取寬閑優游耕釣以爲樂晚陞折衝階生以丁亥卒以戊寅八月十一日夫人系出原州從仕郎啓之女慈惠飭婦行宗鄙稱之壽八十八而辛

亥四月十三日卒合窆于永平治東釣歌洞負亥之原公上祖高麗僕射肯弼我 朝蓮城君威靖公定卿左贊成平胡公漑父子又大顯贈寺正諱台錄贈承旨諱讚卽公會祖祖考諱聲大七十升上庠 肅廟特除寢郎亦贈戶曹參判外祖府使水原白大璣也二男長卽相斗次相軫三女婿監察徐命新士人李濯進士李緇相斗五男養浩養一皆府使養正養中皆營將養義虞侯相軫男養善一女幼徐男肯修永修長李男重郁進士內外曾玄男女數十人噫以公之氣槩行義使出而用於世必多有奇偉可觀而



既不幸以疾自廢年又不登耆耄知公者久已疑天之豐於予而嗇於命也迺今似續繁衍緋貂盈門恩馳亞卿賁耀泉塗嗚呼公於是乎可以無憾而爲善者知所勸矣余故不敢終辭而樂爲之書銘曰  
弗其種之云誰之能穫嗟今與後之人尙鏡考於斯作

全羅右道水軍節度使申公墓碣銘 並序

昔我 仁顯聖后遜于私第小大臣廢朝儀者殆六年獨故節度使申公諱命尹以新榜武科持紅牌四拜于私第門外而去然而公既不自言于人人亦尠

知者及公老且沒而人頗稍稍傳之久而學士大夫始莫不誦說而嗟嘆之咸以爲當其時獨能爲人所不能爲已奇矣尤况絕口不自言詎不益賢乎人哉今公之子以公狀請余銘公墓余遂不辭而爲之敘按狀公字殷卿其先平山人始祖壯節公崇謙佐麗祖著大節入我 朝兵曹判書齊靖公孝昌又大顯高祖諱景進縣監有高識純行曾祖學生諱寔無嗣以弟護軍諱憲子務功郎諱尙周爲後生諱糾不仕配草溪卞氏從仕郎拴之女是爲公考妣公辛未登第壬申拜宣傳官遷訓練院主簿都摠府都事丙子



知不足齋叢書 卷九  
出爲全羅左道水軍虞侯遞拜訓練院僉正又出爲  
黃海道兵馬虞侯壬午陞秩拜大丘營將遞拜安興  
僉使間爲全州羅州二營將皆以親老辭辛卯由內  
禁衛將拜恭谷府使癸巳丁內憂歸服闋復爲羅州  
營將拜富寧府使釜山僉使吉州牧使吉則自釜不  
及還未赴尋歷端川金海二府使己酉春拜全羅左  
道水軍節度使未幾移右水使任滿遞屢爲禁軍將  
及諸軍門千摠別將丁巳八月十四日卒享年七十  
七知公者皆曰善人亡矣公豐貌脩幹力能兼人性  
和緩謙謹休休絕畦畛與物無競不言人過惡不喜

博奕口不出鄙言自幼善事父母出游得新果必懷  
歸以獻之十三遭外艱持喪如成人鄉里稱孝兒母  
夫人疾夜不解衣帶及篤嚙其指進血所之以能於  
職稱修戎備賑饑荒累被獎褒釜山時命賜馬爲政  
便易不苛以是尤得軍民心大丘恭谷釜山俱刻石  
以寓去後思大丘有表忠祠祀壯節公公爲營將也  
倡內外後裔之宰于南者繕廟宇置土田爲永遠圖  
平生恥媚附權門常曰功名倘來物其可強求而得  
哉恤窮族無問疎戚未嘗示厭色所莅多雄腴而家  
猶貧或謂胡不爲後計者公歎曰貧富自有分况吾



一室三世俱食祿吾恒懼焉且復營產業以冀富乎  
老而歸鄉庄日晨謁家廟寒暑不廢携親戚弄諸孫  
以爲樂雅儉約不喜侈華冬不衣毛裘服飾無黃白  
物性甚勤至老猶然見少輩優游無所事者輒責之  
曰人苟不能使一日所事當一日食是謂素餐其可  
乎哉平居恒閱兵家書裒錄中外卒伍糧械舟艦爲  
一書不去手嘗備論四方關防制置形便援古訂今  
累千言識者以爲多中窾可用而尤恨其不大試也  
又嘗遺書戒子孫勉以孝友清白戒以驕傲豪奢辭  
指懇篤君子謂庶幾無媿於馬文淵柳直清云公墓

始厝槐山冠洞戊午冬移窆于同郡大德里坐西之  
原夫人求禮孫氏宣傳官繼業女端良貞淑婦德甚  
備公早游宦多居外夫人教誨諸子克有成就壽七  
十九而先公一年卒祔公墓左有四男俱以武進長  
光世宣傳官出後伯父早沒次光宅牧使次光岳府  
使季光德亦府使亦爲族父後二女長適許冑次適  
鄭世衡武科光世一男得文營將女婿沈激監察光  
宅四男翊文宣傳官致文允文弼文女婿尹洛淵光  
岳三男進文佐文顯文女婿李漢龍光德四男錫文  
遇文應文啓文三女幼許婿所後子屋鄭婿六男逅



延都事運遠逸道女婿金遵武科內外曾玄若干人  
余嘗屢見公固知爲重厚長者人也公之守金海余  
適叨巡察民有假名投狀誣公于余者余械其人送  
公俾自治公畧罪之而不窮究主使者名又余一以  
官事誤示督過意而公但自引無所辨余於是益歎  
公忠實寬裕其貴而且壽後承蕃衍誠有以也今見  
其狀新恩時事寔爲臣道之大者其他俱可畧也銘  
曰

嶷嶷其標逶逶其槩奚啻有外唯其守內獨炳臣義  
噫世之昧事如雲水久莫終晦仗鉞匪貴犬豕匪壽

我儀令名終古不朽莘莘子姓簇簇簪綬孰怠爲善  
請徵公後

陽城縣監金公墓碣銘

並序

廣州之金光里光山金氏自高麗直提學若時始葬  
而族位焉直學麗亾守節不仕其後世有簪組公於  
直學爲十世而從葬于負壬之原公脩幹古貌貌如  
其心性孝義而多恕早孤事母盡誠出遇美味必袖  
而歸獻疾病血指以進暨喪廬墓終三年宗祠在遠  
喪餘日未躬與則設位而祭之哀慟如祖括時已已  
仁顯后出宮公倡同志士守闕號泣人或危之而



知不足齋叢書 卷九  
不顧也教子唯書籍禁毋使貨利字出口樂道人之善而掩其不善然甚確於陰陽淑慝之辨僮僕有罪罕用箠撻但諄諄戒誨雖鷄犬家畜不忍食得生物或見形聞聲輒不食貧甚屢日不舉火亦不肯向人求貸平居固窮讀書有願學者隨材教迪多成就及仕惟奉公惠民是務黃澗時節蓄設三廳以贍補民吏役辦穀累千斛賑飢口蒙褒錫民里刻石頌遺愛在陽城創浦倉以便民出納尊高年恤惻窮前後自邑歸蕭然垂橐妻子內窘而公泊如也噫斯皆今人所不易者在公又何足爲重輕獨公旣踰耆而樹考

瑩石儀繞省哀泣淚成血漬草草爲之赤少績文汪洋大肆與叔氏文學公台壽俱有聲以駢儷對策五發解而竟不第舊時儕友多貴顯咸惜其屈所親一宰官臨科問公以合試題者公偶有對至開場其人果主試而揭以公所對公愕然抱試紙徑出亦不語人以故嗚呼過六十而孺子慕血淚沾宿莽者從古已罕有矣矧乎俗弊而汚士趨日下徒喻於利而鮮知有義讓廉媿會莫如塲屋之尤者觀公之爲豈不誠不可及哉嗚呼公其賢矣夫公諱泰壽字次山高祖諱止男觀察使曾祖諱萍宣教郎祖諱宇仁縣監



知字齊集 卷九  
考諱萬翼佐郎妣善山金氏贈大司憲宗泌女公丙子登司馬癸巳除 永昭殿參奉序遷司穰院奉事司圃署直長掌苑署別提移義禁府都事戊戌出監黃澗縣壬寅罷歸今 上改紀拜漢城府主簿爲陽城縣監戊申逾亂代以武守遞公授司憲府監察尋因言者論公當亂適不在官次謫木川旣而有閑處以經史自娛尤深於字學述字學訓蒙一編乙卯八月十六日疾卒享年七十四臨終儻然無一語及家事但曰吾壽旣高天餉我多矣復何求乎公前配趙氏左議政文孝公翼曾孫其考持韓長男澤根繼配

沈氏其考節度使益晉三男義根漑根智根義根出後文學公孫男女如干人余少嘗習於文學公而於公未有雅也今見公狀文益恨不及公在時從頌承嘉誨不敢以不文辭遂樂爲之言而係以銘銘曰  
恂恂其宅心斬斬其制事居今之世行古與比高數尺者是爲公玄隧過之者其式如其孝如其義

江原道觀察使韓公墓碣銘

並序

公諱重熙字熙甫姓韓氏清州人公自幼文藝出類四歲背誦周興嗣千文盡卷不一錯稍長益勤劬瞻蔚辛未司馬兩試壬午魁泮製仍擢殿試甲科例授



直長以事罷尋除漢城府參軍陞典籍遷禮兵二曹  
郎屢拜司諫院正言獻納司憲府持平掌令一爲司  
諫執義選知製教間歷侍講院司書文學弼善輔德  
成均館司成掌樂院司僕寺正以書狀官赴燕出爲  
延安洪陽縣監纔朞歲輒內召公居言地素不喜矯  
刻激訐唯義理所在無所撓劾朴世堂門徒洪禹行  
請張詖辭眩亂 天聽削仕版有假稱 王子陪吏  
而毆諫隸者公執送法曹俾查治 上疑輕侮 王  
子有嚴教公歷對以實又上疏言 殿下偏係未盡  
祛隨處暴怒忿懣時露願加典學務盡克治自古帝

王之子不患不伸於人而唯患不誦於人今以此爲  
教眎於幼年則恐導迪未盡其道也 上怒責之公  
愈抗論不爲沮先是臺閣論相臣南九萬柳尙運護  
逆而罪之久之始敘大司憲李整指名義爲弄臺論  
爲誣 上復罷兩相遠竄整仍遞救整者其黨並請  
反汗公乃停其論又疏斥整甚嚴時輩久猶斷斷而  
士論滋多公因灾沴請 上降哀痛之旨開不諱之  
門罷營繕蠲征歛一以誠小民祈天命爲急又諫判  
府事金昌集一疏申辨嚴教荐降前判書閔鎮厚譴  
責過中迄靳開釋不納已卯增廣文榜以有換封賊



科者罷之過十年乃復公言事體顛倒物情未允請  
還收不許乙未擢承旨遞爲刑曹參議明年除東萊  
府使賊臣明彥以御史有誣捏語公置對行查無絲  
毫實事竟白屢爲兵曹參議掌隸院判決事最久於  
銀臺纔遞旋授無旬月間休 肅廟昇遐凶黨百計  
鑽進嗾無賴子請追隆張氏公偕諸僚論斥抵罪太  
學生尹志述以 先王陵誌不書辛巳大處分將陳  
疏仍捲堂被配已巳凶孽因赦典蒙釋公俱繳爭之  
景廟冊今 上爲世弟賊臣鳳輝投䟽熒惑意叵  
測公持其䟽求對言 儲君名號既定臣子安敢容

他議請召大臣三司詢問處之及將鞫而旋止則又  
同院僚請討已而命 世弟聽政百僚廷爭不能得  
四大臣上聯劄而相泰者自宣仁門入請對政院以  
泰者方被合司重劾拒之不許稟而遽有引見命傳  
促甚急於是他公卿亦同入旣收前教諸臣言引見  
泰者之命非由於政院所稟則此必有私逕公仍盛  
陳此路一開則外言自私逕入 上教自私逕出其  
害將何所不至不可不查其人正其罪韓世良權珪  
等爭投匭殆同變書公一辭請嚴處俱不省時再下  
別諭於泰者令遣史官公輒封還力陳法例事體決



不可奉行狀事遂寢十一月拜江原道觀察使未及  
赴羣凶竟得志逾臣弼夢等論公政院時事乃削黜  
其徒又請竄邊至公沒始已公歸田舍絕口時事唯  
時時仰屋憂嘆癸卯十一月七日疾卒享年六十三  
從葬于長湍沙鷗谷乙坐原今 上改紀祭賻如例  
公之先自麗暨我 朝冠冕蟬聯至左議政襄節公  
確判敦寧恭安公致仁清原尉景祿益大而顯公旣  
貴贈考僉知中樞諱彬吏曹參判祖諱碩俊左承旨  
曾祖別提諱岵執義妣慶州鄭氏縣監光後女亦贈  
貞夫人公聘延安金氏漢城府右尹潆女延興府院

君悌男玄孫勤儉有梱範舉三男三女男長益增次  
百增季億增文科歷臺垣玉堂爲承旨三女適士人  
吳璞柳懋宗室壘長房先公天無後次房五女婿金  
坦行尹紀東李鼎玉餘幼無男以族子基鎮爲後季  
房亦無男以族子尙鎮爲後公貌豐而幹偉爲人忠  
實寬重恥爲修飾而中自有執守平居言色罕疾遽  
事親一主無違親疾拜禱出日閱月不懈丁憂致毀  
盡禮素澹於物輿馬服飾不以經意立朝久屢典州  
府而家人內窘公則泊如也涖職務守法革弊尤於  
訟獄稱明允喜看書至老不去手星曆算筮亦多旁



知不足齋集 卷九  
通歷代法制關防兵田之屬靡不講究籌度慎交游  
遠勢利不肯馳逐上下論議以進取人有諷之者則  
公輒曰此亦足矣噫公之居家行誼之懿立朝言議  
之正固多出人而最是庚辛之際旁伺者躑躅善類  
咸惴惴唯公長處近密一心勤恪事無間小大可爭  
則爭可言則言要以盡吾分而外至之利害咻喝毅  
然無少恤卒之凶徒齟齬放逐之猶不足而靡有怨  
悔者尤詎不偉甚哉余故習公每歎公樹惇任真臨  
事無趨舍確有古人風今於墓銘之托義不敢辭謹  
敘而係以銘銘曰

觀世之士匪絃卽鼓公獨否敷于臺省讜議是秉無  
虛口任乎喉舌隨輒陳列羣枉指跡公始終外斯寬  
冲確內守奚就奚避惟義其視巧者忸臨湍之麓幽  
宅載卜深且厚攻石琢辭我言靡私詔來後

慶尙道觀察使贈吏曹參判南公墓碣銘 並序

壺谷南文憲公用文學致位崇顯晚以直道忤羣壬  
竄北塞不返旣而世運復清明嗣子碁峰公歷敷三  
司銓郎仍擢銀臺廩廩嚮大用遽又下世士類至今  
追惜之不已云公幼而詞理夙詣少長淹貫經史游  
庠塾多屈曹偶爲人宏厚寬和言議一主平恕絕不



喜激訐詭隨惟臨事論得失別臧否無所避雷異進  
劄請 上以修身敬天怒爲主仍陳政疵民瘼有旨  
內入漆椒公言內旨不由政院該司私自供進恐啓  
後弊仍請節財用毋累大德戒侈靡惕厲無怠旱甚  
請立 聖志以振紀綱恢 聖量以納忠諫勤 聖  
學以修實德且請令諸路疏決獄囚久滯者罪之俱  
嘉納有奸吏律不死而有司奏當死公爭之命更議  
竟貫其死臺臣言時事相繼蒙譴儒臣論柄相奏對  
乖義嚴旨特罷公上章言其過中仍請收還時相欲  
因天旱疏釋已巳凶黨公與三司諸臣爭不可被責

去職言者論銓官行私昵黨黨之者反攻言者公論  
斥其冒嫌有右其人以擠公者 上曰好論議護私  
黨非某能事也噫 聖主其知公矣夫公辛酉進士  
甲子補內侍敎官陞司導寺主簿戶曹佐郎出監抱  
川縣已巳登增廣文科旋值奸壬秉國捏微事坐罷  
甲戌更化 上首復文憲公爵公亦卽除司憲府持  
平屢入玉堂自副修撰修撰副校理校理至應敎或  
再三焉於諫院三爲獻納一爲司諫於吏曹佐郎者  
再正郎者一春坊則自司書至輔德亦屢兼而常帶  
三字銜備邊司纂修廳郎廳則選也他漫除不盡記



間爲養乞外朝廷重其出命賜穀布後又陳情上  
不由該部而特許之暫爲襄陽縣監未幾內召以御  
史廉問海西刺貪戢豪條上便宜多蒙採施庚辰陞  
通政階除同副承旨遞爲工曹參議復求邑除三陟  
府使旋移忠清道觀察使以親瘠辭復還銀臺明年  
拜廣州府尹俄而臺諫追劾已已一榜當 坤位將  
傾赴試如常蓋殿試前一日 上將有大處分下教  
示意而公則未及聞也然公猶痛恨不置甲戌除憲  
職首以此自劾及是人多謂宜分析情實而公但佯  
佯深自引不爲之辨也大臣以重任久曠白于 上

許遞卽歸先墓下冬爲天安郡守辭不就已又除綾  
州牧使力辭如天安迫而後始勉赴甲申春棄歸道  
拜慶尙道觀察使又固讓終必遞乃已是歲七月二  
十三日疾卒享年五十二訃聞祭賻如例後以判決  
公秩二品推恩贈公嘉善大夫吏曹參判兼帶如式  
公諱正重字伯珍碁峰其自號也其先有自中國來  
者受籍于英陽至高麗密直副使君甫始徙貫宜寧  
遂爲宜寧人自後簪組相承國初領議政諱在以勲  
業最大顯高祖諱復始縣監贈贊成曾祖諱鎮都事  
贈判書祖諱得朋府使亦贈贊成文憲公諱龍翼吏



曹判書兩館大提學妣平康蔡氏司憲府持平聖龜女公葬于揚州東海谷先兆向庚之原夫人慶州李氏吏曹參判寅煥女簡穆而慈諒孝順恬儉有女士稱耐公墓左一男漢紀行掌隸院判決事六女婿郡守李廷燁學生李昌朝判官洪禹集大司諫李道謙進士鄭錫命掌令閔翼洙孫男長有常文科早夭贈修撰次有容亦文科承旨次有定孫女婿士人李德弘奉事金純澤士人申景翰李奎亮外出男女暨曾玄摠若干人公事親奉先致其誠撫庶弟妹篤恩愛調辛甘嚴於辭受不言家訾爲邑省賦徭課儒武勤

聽斷倉廩充溢而歸橐如洗宅不增一架田不衍一畝被服飲食蕭然如寒士出無馬常假於人然而不祈知於人人亦不能盡知也綾民磨崖寓去後思及喪襄綾二邑人爲致千里賻噫以公之賢使之進乎廊廟與聞邦政豈不益偉然庇民而尊主哉亨衢方闢大限旋促竟未能布其一二重可恨也判決公常託以墓碣未及成判決公奄又不淑顧未敢已諾謹爲之銘銘曰

肅廟改紀俊又登崇朝論內潰黨議交訏公處其間壹是和衷奚激奚隨誰異誰同君違輒匡所願者忠



窾言必挂維直且公 聖主知臣袞褒斯隆玉署橫  
經天臺考功歷遍清華令望顯顯旣擢喉司旣涖左  
馮在所殫職益勵匪躬謂降大任懋著績庸胡遽不  
遺中道告凶清標雅操疇復比蹤善類嗟惜久愈傷  
恫我追刻詩昭揭無窮

成均進士贈議政府左贊成金公墓碣銘 並序

惟金氏遠有代序新羅宗姓分籍諸州其貫清風者  
自高麗侍中大猷始我 朝司憲府執義耄其孫湜  
成均館大司成己卯名賢公其後也會祖諱埴領議  
政文貞公以經術德望相 孝宗祖諱佑明誕 明

聖后封清風府院君諡忠翼有四男第二諱錫翼漢  
城府左尹第三諱錫衍工曹判書俱位居元舅小心  
謹慎繼長戎垣爲國蓋臣左尹公配坡平尹氏監正  
俠女無嗣判書公配咸從魚氏郡守尙儁女生五男  
公居其三 肅廟命以公爲左尹後公諱道泳字子  
游幼而重厚淳慤言動舒遲如老成人事父母友兄  
弟俱盡其誠旣長劬書甚勤孜孜不輟有疑必質問  
討論究極其歸趣而後已暇則臨古帖習字手不近  
博奕雜戲於物泊然無嗜好被服儉素人不知爲綺  
紈家子弟也公外若斷斷乎無技而中實周詳瞻密



海昌尉吳公泰周常加期許已卯成進士沈太宰宅  
賢時與同研每稱公詞翰適美不可及庚辰四月十  
七日以微疾遽不淑得年僅三十前輩知公者咸悼  
惜不已或歎其關係時運嗚呼公以藐然一書生跡  
不涉世塗名不出里巷而其能得此於人者夫豈無  
所以哉苟天假之以年卒有以立揚則必將承繼先  
武左右 王室蔚然爲家國之光而闕而不遂又曷  
故哉公娶海平尹氏其考別檢夏明舉二男一女男  
長聖廈蔭仕府使出後族父尸文貞公祀次聖應以  
武顯曾任兵曹判書女適牧使李潭府使男寂默二

女婿士人趙湛韓民教判書男長時默文學爲後於  
從叔父承忠翼公宗事次持默生員次峙默三女婿  
教官李憲鎮士人趙瑗李商護牧使三男謙鎮有鎮  
濟鎮長主簿兩婿生員徐命敷士人宋翼柱寂默男  
基長婿士人徐厚修時默男基大以判書貴累贈公  
至崇政大夫議政府左贊成兼判義禁府事 世子  
貳師五衛都摠府都摠管夫人從封如例受真誥噫  
公所以遺羸而歸成于後者斯可見也而公之天至  
是而定矣公墓在楊州金村亥坐原寔大司成以後  
至文貞公累世族位地也判書兄弟要不佞銘公墓



既辭而遂爲之銘銘曰

猗質之厚而行之飭宜達而壽胡室且嗇俾昌厥後  
理罔終忒譬彼易畝迺秋有稽篆此螭首其永無泐

殷栗縣監贈吏曹參判金公墓碣銘

並序

仙源金文忠公殉節于虜難國家表其閭曰忠臣之  
門其子諱光炫吏曹參判以正直聞于時生諱壽民  
德山縣監以仲子貴贈吏曹參判又以孝旌焉是爲  
公三世始祖曰宣平以高麗太師食古昌古昌今爲  
安東子孫籍焉公爲人慈諒明敏介潔有守早喪怙  
恃以爲終身痛事季姑李夫人如母所居十里而遠

日往候非甚病不廢李夫人亦子視公愍公貧欲予  
以近家小田公力辭終弗受奉二兄如嚴君仲氏大  
諫公亡公事孀嫂拊孤姪多人所難及以長房主文  
忠公祀罷輪祭俗規躬薦享甚慤與人交必以誠款  
不爲翕翕馳逐遇聲色紛華意象落然常謂士寧受  
簡亢諄不可屈已循人有位高而善酗罵者嘗見公  
於伯氏郡守公座歸語人曰其中有苦客令人不樂  
其見憚於人如此然處僚案間雖弦韋異趣而咸愛  
慕之至或終身稱述而賤隸之一經服事者皆追思  
不已居鄉足不入官府所處有竹樹湖山之勝左右



圖書潛心玩繹以自娛爲詩文藻思瞻敏操筆累百  
言辭理沛然已已 仁顯王后遜位公嘆曰彝倫敦  
矣卽廢舉甲戌更化乃復赴已卯登司馬兩試旋見  
有竊科獄仍遂絕意公車壬午除 穆陵參奉移內  
侍教官仕滿陞掌苑署別提歷義禁府都事工曹佐  
郎在所稱職除殷栗縣監未及赴以丁亥二月十一  
日疾卒享年四十六四月歸葬于洪州鳳首山參判  
公兆右桃井洞甲寅移窆于舊壙東已坐之原公諱  
盛道字季由妣南原尹氏其考牧使衡覺公聘平山  
申氏通德郎悛女大司成敏一孫慈而莊裕而介在

室已以孝友稱及歸公配德無違事夫子處娣姒俱  
可爲則公旣葬踰月而哀毀疾益尅顧語戒諸子命  
後事甚治卒祔公墓左舉四男三女男長時侃縣監  
次時翰時筦季時榮文科方爲忠清道觀察使推恩  
贈公吏曹參判夫人從贈如式女婿長權者參奉次  
任翼周進士次李挺樸文科孫男敬行毅行常行出  
繼季父悌行出繼族父女適李斗天長房出男恕行  
女適參奉李復天次房出男哲行女適校理李惟秀  
士人安宗翰朴胤源三房出季房繼男常行後有男  
方行女適士人李晚彬權婿男揔進士攄參奉捷生



員女歸趙榮運李婿男心普容普惠普女歸洪相辰  
公既敦於行誼姿又近道雖不以學自居而內實篤  
志族兄農巖文簡公嘗喜聞而叩之則公謝辭終不  
對農巖歎曰無所爲而爲者吾必謂之學矣及沒三  
淵以書吊宗人深悼其仁明孤直而以爲吾宗之砥  
柱仆矣圃陰則又爲誄以玉壺朱絲擬之噫夫以文  
簡公與三淵圃陰皆儒林宗師於人鮮許可而獨於  
公如是則公之爲公斯可知已顧乃格於甲乙未揚  
王廷黽勉祿仕不及施于一邑而壽靳中身舍用卽  
世寧不可恨也然而公卒時諸孤俱穉弱各能成立

觀察早登朝歷敷其進方未已公之歛不自有垂裕  
于後者今焉可徵斯可以見天道歟拓基纔勝冠居  
公比鄰竊仰公風儀閒靖氣度穆然自令人起敬至  
今將五十年未敢忘也茲謹就其家牒掇其大者而  
系之以文簡三賢之語仍爲之銘銘曰

維忠維孝維民之則維公淳行載世先德介爾不羣  
壹是簡直夸毗馳騫彼哉軒紱泊然內蘊沈于下列  
旣靳厥施奚齡之嗇儒老之怛士友攸惜少子立揚  
榮賁窳窳其報也羸理罔終忒有不信者視此銘刻

工曹參判申公墓碣銘

並序



平山申氏咸祖於高麗壯節公崇謙我朝左議政  
文僖公諱槩吏曹判書文節公諱錦仍祖孫以名德  
大顯又二世有諱砬始以武畧進八道都巡邊使生  
諱景禎靖社元勲領議政平城府院君諡忠翼生諱  
垓敦寧府都正生諱汝哲判中樞府事兼兵曹判書  
諡莊武是於公爲王考考諱璫仕止司僕寺僉正贈  
吏曹判書妣慶州李氏牧使時顯女領議政文忠公  
恒福曾孫公諱光夏字士晦生而端雅弱不好弄甫  
踰冠有以公將家子薦于朝肅廟特召見獎勉出  
常卽除宣傳官壬辰登武科庭試試日掖隸承命接

踵問公中否一場咸聳陞訓練院主簿歷都摠府都  
事經歷訓練院副正仍陞正兼內乘又差訓練都監  
千摠未緋玉而爲千摠自公始卽武班極選也丙申  
進階爲羽林衛將歷春川長湍二防禦使丁外艱服  
除除忠清道水軍節度使未幾陞嘉善除京畿水軍  
節度使兼三道統禦使壬寅內移禁軍別將間爲黃  
海平安兩道兵馬節度使定州安岳寧邊三邑守俱  
不赴甲辰再除寧邊公不敢屢辭黽勉之官明年改  
紀擢拜摠戎使兼都摠府副摠管捕盜大將訓練院  
都正除漢城府左尹丁未移御營大將前時黨人復



得志深恚公不附已遂彈公不可任將 上雖靳許而公竟辭遞戊申復爲摠戎使庚戌因事罷秋拜水原府使旣歸爲左右尹摠管者幾十數屢兼捕將丙辰拜工曹參判以是歲六月二十八日疾卒享年四十九訃聞祭賻如例初葬楊州後改卜于水原禾方里子坐之原公凡再娶前夫人金海金氏考右議政宇杭無育祔公墓右後夫人完山李氏成均進士檄女二男長暎生員季旼武科承旨側出男晁公天質靜重呐呐若言不能出口而內明於是非之分自以世家將門雖不欲標榜而中實確然有守外黨柄國

者欲公之爲已用多方餽說而公終不動其人又欲述莊武公墓文人多勸之而公亦嘿不應有武將位司馬者爲世所指而數來訪致慙慙公一不造謝雖見慍不少而不之恤以公之早負重望期許甚盛而一登師垣輒遭噴言後不得復拜者蓋亦由是之故也又嘗一宰臣登對詆公趙豐陵文命進曰某爲人恬謹誠可法居常沈默少言人或疑其不曉事然其任摠戎戎政克修無闕遺疑之者誤也蓋豐陵代公摠戎所以知公如此及公沒 上下教褒之以不染不俗深致悼惜之意後又臨筵稱公中有所存終爲



完人噫公之受知於 聖明者又不可謂不深矣公  
事親盡其誠方疾革猶恐貽母夫人憂戒旁人毋告  
任官內外簡靖不煩民物晏然庫儲充牣聞人不廉  
如將浼已又不係情去留未淹歲輒求遞家居不喜  
交游不事產業寓意杯酌非公故不出門恥爲隨衆  
進取計公既不求人知人亦少知之者又困於齒舌  
局於短造終不克久司戎柄益振祖烈識者爲公恨  
之然其視趨羶逐臭賭榮一時而辱先敗名爲人所  
唾鄙者公其可以此而易彼哉若公其可謂賢矣夫  
余與公同朝數十年識公久且深矣今於墓銘之托

誼不可辭銘曰

赫烏名閥珩第相承始繇文進中迺武興公初發軔  
異眷屢膺闡鉞卿班遷擢頻仍戎壇旋陟祖武佇繩  
視公粥粥外若無能內晰而辨弗爽淄澠確爾自守  
忌者攸憎胡齡未艾一疾遽乘完人不染 聖教亟  
稱何以得此靜且有恒我銘昭揭來者其徵

旌善郡守洪君墓碣銘

並序

吾友洪君敬伯長余一歲生與余相得甚驩也敬伯  
美髭髯神采秀朗祥順樂易然而中實有執守少而  
詞翰已夙就人咸謂一第不足取竟不諧屈蔭塗又



不克壽官不過四品甫五十八而丁卯八月七日卒  
葬于積城佛峴先兆坐壬之原與其配淑人全州李  
氏同塋而異室其胤子朝海請余銘其墓噫余誠不  
能文又安忍辭敬伯諱啓欽敬伯其字也洪氏系出  
南陽自高麗太師殷悅至我 朝冠冕蟬聯勲伐德  
業炳烺簡冊高祖諱命元京畿觀察使贈議政府左  
贊成曾祖諱處厚亦官畿伯贈領議政祖諱受澆順  
興府使考諱禹瑞司諫院大司諫妣青松沈氏府使  
益善女敬伯丙午擢進士壯元辛亥除 惠陵參奉  
轉長興庫奉事宗簿寺直長嘗入輪對將退 上目

名分或茹柔以沽譽君則唯理曲直是視三邑皆用  
是道焉按道者以備戎械葺官宇褒聞將陞秩乃歎  
曰浮沉米鹽已非我素志又以是博資級何以歸拜  
先人所司知其意止請陞敘始大諫公以清名雅望  
大見重朝右顧厄於年士類至今追惜君旣風儀酷  
肖而又文藝敏贍政術流通朝暮且大闡以卒大諫  
公志業雖不爾亦應作大州稍施其十一而乃止於  
是知君者蓋莫不嗟悼焉噫余今老而閱人亦多矣  
每念君賓會微醺談論偉然間以諧笑風流溢發蔭  
映四座已又歛容莊默人未易以狎進也豈世之降



使如君者終不能有以揚于 王廷為國楨榦也歟  
嗚呼歎矣銘曰

猗嗟敬伯士望蔚既自中積又外發宜爾重較珩且  
第奚其命局室未達數邑聲績寧足述銘茲貞石來  
可質而無愧色故人筆

成均進士贈吏曹參判朴公墓碣銘 並序

今 上甲戌春用國典以黃海道觀察使臣相德秩  
視二品命追贈其考成均進士興源嘉善大夫吏曹  
參判兼同知義禁府事五衛都摠府副摠管其母孺  
人李氏方無恙親授貞夫人先是觀察以先銘託余

由工曹佐郎為石城縣監陞辭引見飭諭甚切益感  
奮自勵居五歲治理著聞移陞海州判官未幾坐微  
事罷旋拜刑曹正郎李判書秉常主賑事辟差賑郎  
俄除旌善郡守會本路有改量役道臣又舉以兼從  
事董察五邑量政既滿十考最民請借於州使者而  
不能得還家月餘疾不起男長朝海次鵬海早天三  
女婿長李明煥正言次俞彥鉞進士次具好身朝海  
男相鼎女適韓鼎暮李二女婿趙學溫金星燦俞一  
男漢馮餘幼敬伯平居事父母以誠人稱其善居喪



與弟析居泫然而悲病亟不能語猶問弟安在推之  
睦宗族恤窮乏多人所不可及涖官簡而明善聽斷  
人不得干以私折獄必先正名義崇文教重祀典石  
城素丁艱而軍額相倍蓰則括游民各試以其業汰  
簽其尤無能者時朝廷遣御史諸道釐軍弊至是縣  
已如洗御史深歎服賑飢檢糶一意不懈雖隣丐亦  
一視而哺之曰同吾赤子也繕廨館噲然改觀海州  
爲巡察使營下地大而俗囂尤難治律已束吏奸猾  
屏氣民賴以蘇旌善時值歲荒營賑如石城臨歸行  
世之爲邑者或偏於制強往往病

而未及就乃勉恩將之任又趣之曰斯固非有待而  
若有待也石已具願子之母久靳也余不得復辭遂  
敘而銘之公字起甫朴氏新羅宗姓分籍羅州之潘  
南縣遂爲羅州人麗末有諱尙衷直提學 本朝特  
諡文正生諱嘗左議政諡平度自是簪組蟬連名德  
相望至文康公諱紹大司憲諱應福忠翼公諱東亮  
益大以顯忠翼生諱瀾儀賓 穆陵封錦陽君諡文  
貞是爲公五世以上高祖諱世橋掌樂院僉正贈吏  
曹判書曾祖諱泰斗高陽郡守祖諱弼夏 敬陵參  
奉俱贈左贊成考諱師正禮曹參判贈領議政母貞



敬夫人咸平李氏贈參判宅相之女公風儀俊偉器局寬重未嘗有疾言遽色事父母婉順先之以養志敦睦羣從以及乎宗黨自幼受業於叔祖文敬公諱弼周有志于學於曾傳魯論最用力見古人嘉訓格言必書壁以自警濂洛文字歷代史傳靡不泛濫融會國朝典章沿革亦頗諳貫又勤治功令家言所述殆千餘篇每誦范文正先後憂樂之語慨然遐慕發於言議者類多爲世道深慮間值會心人上下今古激昂揚扞常謂士大夫秉心當如青天白日處身宜壁立萬仞臨事斬斬不苟也然又弘於受善忠於爲

人文敬期許最重凡於出處之義淑慝之辨多與之反復商確十九登司馬游太學持論峻正聲望蔚然秉銓者耳其名而不知其年之未準格也一注官不做丙辰別試發解不及殿試乃以其十一月二十二日疾卒得年僅二十九訃出知公者莫不失聲驚悼文敬尤慟惜久愈不能忘也明年正月葬于仁川南村坐甲之原李夫人系出天潢其考青陵君模三男長卽相德次相岳出繼叔父亨源次相喆出繼季父錦城尉明源二女婿士人柳正養申光緝余與參判公交游三十年見公幼時至于盛壯每謂其瓌材儔



望直是國器朝暮必大登顯而遽止於斯豈世級漸降運氣推盪修短屈伸反盪常度而然歟然而觀察蚤釋褐按藩榮賁泉塗天之所以報施者其在是乎銘曰

騏驥仆途豫章委地物有然者人則甚矣文敬誅語實近取譬予之既豐奚命獨否玄宰芒芴士友嗟喟早顯厥嗣歸羸蓄社命書煌煌光于冢隧好辭深刻隆碣斯峙天定在茲來世其視

清道郡守李公墓碣銘 並序

我 世宗莊憲大王別子曰廣平大君章懿公諱璵

有河間東平之譽是生永順君恭昭公諱溥文章勲業為宗英首於公為十世公諱顯行字士能高祖諱厚載僉知中樞府事贈吏曹判書曾祖諱迴司憲府掌令贈左贊成祖諱重輝錦山郡守贈領議政三世之贈以公伯父惠定公濡貴故考諱湛林川郡守妣廣州安氏贈承旨時秀女廣陽君滉曾孫公丁未中進士壬子除 光陵參奉歷內資寺奉事 恭陵直長濟用監主簿丁巳由工曹佐郎拜高靈縣監既準瓜以滿十考最內陞 貞陵令轉工曹正郎癸亥除清道郡守丙寅六月五日疾卒于官壽六十二葬于



廣州下道枝谷庚向之原公爲人溫重慈祥孝友敦睦言議明剴文藝夙就侍親疾八年如一日丁憂三日水漿不入口葬後猶不近羹菜事諸父諸母以及兄姊愛敬備至撫孀姪如已出教諸子甚嚴及長子登科則深懼招損每戒以從義毋忝與朋友推誠相與不苟隨傲謔平居儼然端默與人語藹如也居官當事恪慎不敢惰嘗因輪對奏白最詳 上嘉之問知爲惠定公從子教以其容止亦甚似故相也爲邑正名分申教化聽斷公明課儒生講述禮高年設宴以娛之戢鄉戰行鄉約民或骨肉相鬩諭以恩義多

退而改行採孝節聞于使家以請褒歲飢分賑甚精愛民雖甚切而不姑息以市譽節縮官用別設庫革民吏宿弊要皆經遠可久旣卒人士哭而送喪者數十里不絕巡察使權公懾又上公治行言立約正俗勸民飭農俱有實效不幸喪逝民莫不悼惜云公配咸陽呂氏軍資監正必寬女哲識懿度六親咸稱先卒而祔于左舉三男一女男毅中弘文館校理早沒有男商輅正郎女婿洪念海次彥中都事有男商護商黼商素季翊中一女適金相鳳進士噫以公之志行才猷何適不宜而誦于科第低徊數邑所歷試者



知字彙集 卷九  
僅止於斯斯固知公者之所深慨而校理君妙齡發  
軻若將以卒公未究之業又忽中闕是曷故哉豈亦  
天意有待於後歟公之任高靈余叨按使旣深服公  
之賢而有政至今未能忘校理君托余以墓銘而尙  
未就每思之怛然恐負逝者遂爲之敘次而銘之銘  
曰  
行篤家庭治成郡邑古亦匪易於今誰及端儀明識  
限于黃甲其用莫究士友嗟悵而後必熾左契可執  
有如不信請眎銘什

同副承旨李公墓碣銘

故通政大夫承政院同副承旨兼經筵參贊官春秋  
館修撰官李公壽七十有二而卒于崇禎甲申二月  
十五日葬于楊州野牧里負乾之原後用寧社從勲  
追贈嘉善大夫禮曹參判別職如例前夫人光州金  
氏縣令振綱女別葬海州後夫人昌寧成氏通德郎  
佑邦女祔公墓公八歲而孤少長力學乙巳進士值  
昏朝遯跡海曲 仁祖改玉公掌太學議整儒案斥  
去凶徒迨适誅別設庭試公以 恭陵參奉中第分  
隸槐院明年拜咸鏡北道兵馬評事帥臣負勢驕恣  
公一裁之以義召拜司憲府持平歷司諫院正言侍



講院司書累除兵曹禮曹刑曹正郎吏曹佐郎司憲  
府掌令成均館司成承文院判校兼春秋館記注編  
修官外則爲舒川郡守寧海密陽府使陞通政歷兵  
曹參知禮曹參議至承旨公諱士祥字善應其先龍  
仁人鼻祖吉卷高麗太師入我朝有諱伯持刑部  
典書錄清白旣三世有諱績司僕寺正又三世至諱  
蓋忠兵曹正郎於公爲王考考諱啓仁成均生員以  
至孝聞贈左承旨妣國姓李氏僉正克綱女公生三  
男後傑翊贊後老正郎後昌生員三女婿長崔致榮  
奉事次韓聖舉尹塽孫載岳贈承旨鎮岳女婿李維

漢李昌稷俱翊贊趙愷生員姜碩蕃長房出次房繼  
子胤岳縣令三房三女適李相鼎縣監尹脩金錯參  
奉庶子岐岳武科曾孫世規參奉世矩縣監世準世  
聃縣令世雲佐郎玄孫以下不盡記而大司諫宜哲  
司諫宜老校理宜菴正言普溫最顯公性簡率儉素  
與人無表襮喜詩酒尙言議詞翰見推儕流處臺閣  
常引正守義爲邑則慈惠廉白旣歸而民有刻石頌  
之者然而釋褐旣晚公又泊然不數數於進取位不  
稱其德寧非命歟公之下世已百有餘年而墓尙無  
顯刻公之諸後孫以拓基爲公之伯氏大諫公彌甥



俾識之義不敢辭是爲銘

掌樂院正贈吏曹參判宋公墓碣銘

並序

同春宋文正先生有一男諱光棫賢而蚤世仕止工曹正郎贈左承旨聘大提學趙文孝公錫胤女舉四丈夫子公居第二諱炳夏字子華十九而孤事文正公誠且敬事或有疑反復質其故文正公尤賢而愛之常語家人曰此吾家御史也間就學於尤菴先生先生亦深期許 顯宗末命公卿薦士閔文忠鼎重舉公應命 肅宗庚申始拜 禧陵參奉未幾病免明年除水庫別檢敘都監勞陞司僕寺主簿拜牙山

縣監期而辭歸丁內艱乙丑制除差宣惠郎廳拜德山縣監三歲辭歸明年拜敦寧府判官復兼惠郎已巳凶黨得志卽日棄官還鄉甲戌更化除掌隸院司評不就拜益山郡守無何復辭歸拜掌樂院僉正旋陞正辭遞丙子春擢除水原府使不悅者諉以驟陞請改正 上終不允而時相謂公病不可赴白于上而遞之未幾除忠州牧使辭不赴丁丑除司導寺正病未拜四月五日疾卒春秋五十二始葬公州甲子遷窆于懷德學堂山負艮之原配淑人安定羅氏贈參判星遠女參議萬甲孫生後公一歲享年九十



一葬祔公墓育二男一女男長堯卿出後伯父官至同敦寧次堯和亦官同敦寧推恩贈公嘉善大夫吏曹參判兼同知義禁府事五衛都摠府副摠管淑人從贈貞夫人女適牧使趙駿命堯卿男台鉉早沒繼男復欽女婿縣監沈命達金時吉庶男有欽堯和男益欽縣監女婿府使金致恭趙婿繼男載福縣監內外曾玄數十人公內行甚備文正公喪不肉外寢以終制友兄弟恤宗族多人所不及少雖屈意場屋而不數數然遇宿構乃改製以呈惟致力於儒家文字尤好看朱子書然而亦不以自有朝議別選學行士

如干人將擢用而公亦與焉則益蹙然也在家子弟無惰容於前僮僕不解體於下門內肅如也居家服用只取苟完聲色博奕恐或近前其涖官切戒干私與要譽絲毫不犯不令而威吏懼民安所至大治臨歸民或遮道守門而不得留則刻石而頌之公性本慈仁惻怛而最嚴於邪正之辨赴益山也南九萬柳尙運兩相以文正公門人送之于城外公面責其曲貸國賊傷先祖之明已又貽書以絕之羅夫人修已處事極其高遠未嘗讀書史而古今事跡亦頗領會重名義貴禮法嘗誡子孫曰富貴有命不可求而得



願汝曹學而爲善人則幸矣有欲官少子者嫌其早請止之宗族隣里有飢乏顧恤如不及嗚呼文正公房下固難爲孫也而公之德器行懿乃如此士友間期望方深苟使之蚤加登擢進位乎廟朝則其庶有以尊主而庇民克承文正公志事而公旣逡巡遜避自同常調壽又甫過中身舍用未究斯誠世運攸係士類所以至今悼歎而未能已者也噫銘曰  
古人稱君子之似玉曰純淪溫潤柔而堅玩而廉其殆公之謂乎請以是揭之乎公之墓以眎百世

司諫院大司諫洪公墓碣銘

並序

景廟辛丑冬三司諸臣劾相泰者冒臺論入北門無政院啓稟而遽承引對命合辭請拿覈未幾一鏡等凶黨遽得志充滿于朝反請究三司所從受意欲以薙士類耽耽如也經歲而上久不從明年相錫恒入侍又以是爲請而上不答臺臣欲連啓則他同入者俱以爲大臣已得請不須復陳衆口如一旣退而承旨令注書出舉條將以捧傳旨下攸司施行是日洪公聖輔實攝堂后力辨其非實勸承旨啓稟則上果以勿煩爲教公於是益痛凶黨從前所爲罔非出於矯誣而一隊士類之得免者實公之力也凶



知不足齋叢書 卷九  
黨之側目於公自此而始公則確然不少撓雖顛躓困厄而夷然也嗚呼如公者豈不誠難矣哉公字幼亮其先豐山人 宣廟朝有諱履祥大司憲以德行經術爲名臣於公爲五世高祖諱霽府使贈參贊曾祖諱柱文縣監贈參判祖諱萬鍾都承旨考諱重華成均生員贈吏曹判書公幼而俊拔不待勸勉能勤讀書十二而孤益自奮勵手不釋卷藻思驟進見推士友間庚寅中司馬甲午除 長寧殿參奉未幾罷復除 英陵參奉丁內艱憂吉登辛丑文科由侍講院說書陞兵曹正郎出爲慶尙道都事遞復除忠清

道都事辭不赴乙巳以御史廉問關西褒黜廉貪吏條陳民瘼多見採施又拜兵曹正郎差 肅廟實錄 郎廳移侍講院文學疏陳教導 東宮之要丙午拜司諫院正言時三司合啓討逾而一切斬允公上疏請亟從公議遞爲文學司書又拜正言司憲府持平連上章累千言極論君德有關懲討失刑及調停之非恤災之方其論鳳輝及一鏡疏下五賊罪狀尤明白激切優批嘉納丁未公已參弘文選而都堂未及完錄 上特除公弘文館修撰入講筵敷陳明鬯上動容稱善應製 御題詩箋俱高等賜馬裝擢廣



知守齋集 卷九  
州府尹適又朝廷有大進退公亦坐前三司事不赴而罷戊申逾亂北路安撫使尹公憲柱辟公爲從事公乃同尹公嚴查監司益寬中軍昌悌等凶圖甚悉以聞于朝已選知製教拜兵曹正郎差書狀官擢東萊府使除北評事修撰校理俱力辭辛亥 上以江界邊面重地命廟堂擇擬洪領相致中以公應命公勉赴卽歸連除工曹刑曹參議掌隸院判決事屢爲承旨大司諫屢上疏規勉 聖德請開言路爲茂朱府使未朞而治化大著民鑄鐵頌之除舒川郡守捐廩振飢民無流亾儲穀備迎送馬貫邑人賴之道臣

褒聞錫馬除江陵洪州辭不赴辛酉出爲寧越府使莊陵陟遐時侍女多投江死者名其地曰落花巖公刻落花巖三字於石而構三間屋名以愍忠又置田而屬首吏俾每年寒食一祭之壬戌六月七日疾卒于官春秋五十八訃聞致賻如儀初葬忠州先塋丙寅遷窆于州之山尺里坐寅之原夫人豐山沈氏郡守珰之女德懿甚備葬祔公墓左舉三男長綺漢參奉次絲漢進士次綸漢三女婿金翼升李心普趙重顯俱士人公器度弘遠識慮忠實平居儼然人不取干以私每以風節自勵不撓於禍福嚴於忠逾之



分晰然於是非之公故前後凶黨之積憾於公者乘機詆誣甚多而賴 聖上明察終不敢售焉常以幼年失怙爲至痛事母夫人盡孝居喪奉祀遵禮無懈以及內外族姻咸致恩義任官奉公廉儉聽斷如流跡未嘗踵權門視世之躁競者如浼每謂士大夫若爲富貴功名所使則陋矣市井射利之徒不許近門惟左右書史高臥吟哦爲詩文瞻麗可稱戒子弟閑出入惟勸以勤學噫以公之資地材識旣發軔清朝受知亦深宜公宜卿宜居人先而只以守正不阿偏被齟齬位纔下大夫而天又闕其年壽此士類所以

深爲公悼恨不能已者也今綺漢來求余銘公撫念平昔其何忍辭銘曰  
偉然儀度挺然志操何適不宜誰復先之謂必大受高顯朝右位止緋銀壽欠六旬奚命之局識者攸盡刻銘幽墟其永令譽

金城縣令李公墓碣銘

並序

嗟乎余與夢與交四十四年而夢與沒沒又已十有六年矣余獨老白首至今存每念其儀貌偉然目光炯然訥於言言若不出口外若於事物澹蕩不加之意不知馬之幾足者而其中則堅固如金石臨義利



確然不移了然於愿茲情僞之辨自兒時文譽已藹蔚既長而名聲噪一世入場屋士咸願一識面而顧乃退讓恭遜逶逶如也未或有自多色言不及雌黃然而或與會心人語則眼空千古雖世所稱賢且才者渺有以當其意然此在夢與亦餘事耳其事父母實有至誠深愛侍側而愉婉洞屬養疾而焦爇憂迫慈良於居喪慤創於承祀俱足令觀者感歎晚爲二邑尤恨其不洎不衣帛不重味薦奠必出涕教兒至小學事親節感泣不已噫斯豈若割肢體啜粥糜以爲孝者之可比哉睦於宗族厚於朋友有失輒言之

故雖親愛而亦憚之誨子弟先行儉而後文藝不喜交游有一弟曰文輔行誼文學世稱二難君與相愛至篤日夜閉戶論說講磨以爲樂少病胃不能刻苦讀書而書未嘗去手聰悟絕人一過目終不忘蓋自經傳史記以至莊騷老佛靡不涉其流而嚼其馘爲詩深於自得遇境援筆不似思索而句帖體圓格力雄暢識者謂近代所罕有文亦不肯蹈襲陳俗語屢發解竟不第猶以親意黽勉焉孤露後遂廢舉有遺稿四卷行于世少而最致力大學晚乃潛心於易不以得喪欣憾嬰懷身雖坎否而心未嘗不亨常語人



曰知富貴文章外有事乎老屋頽垣不能庇風雨蓬蒿四擁蔬糲不繼而頽然弛置道然高臥看雲嘯詠以自悅自號東溪居士除日至門始知爲某官噫此豈俗人所可幾哉君諱英輔夢與其字李氏延安人遠有代序至我朝樛軒文康公石亨月沙文忠公廷龜益大以顯文忠次子諱昭漢刑曹參判於君爲高祖曾祖諱弘相承文院副正字祖諱儀朝宗廟署令考諱華臣階通德郎有醇行厚德妣平山申氏左參贊忠景公鉞之女君甲午擢進士壯元士望洽然時崔相錫鼎爲諸生代撰祭尹相拯文陰詆尤菴

宋文正先生君率館學章甫上疏痛辨之丁酉除靖陵參奉遷司饗院奉事敘勞陞內資寺主簿由司憲府監察移戶曹佐郎辛丑秋爲永同縣監壬寅士禍大起善類奔迸君亦被其誣劾罷乙巳丁內艱制除拜尙衣院別提尋移戶曹佐郎不仕戊申自漢城府主簿除咸悅縣監不赴庚戌又除戶曹佐郎又不仕辛亥丁外艱甲寅自宗簿寺主簿陞工曹佐郎又不仕丁巳由翊衛司衛率爲陰城縣監秩滿歸癸亥拜金城縣令丁卯疾甚棄歸竟以二月二十四日卒壽六十一君歷官無內外簡素務實恥爲赫赫名約



已以率下又多寬恕而不苛吏民便之慎刑獄崇節義振民飢急人窮俱有可紀前配光山金氏司圃署別檢萬年之女婉恭高潔尊章甚宜之先沒而合窆于廣州文暎山壬坐之原有二男長源廣源後配潘南朴氏成均進士泰來之女有一男二女男述源女長適宋達淵次適沈能裕長源才而天有一女適金基大進士廣源爲君之弟之子有一男幼述源出後族父承文忠公祀有一男一女皆幼嗚呼尙記癸亥夏余蒙恩召自漢湖舟至茅島夢與臨夕馳到與之聯枕微雨滿簾江風送涼相與論出處行藏之義至

雞鳴未已夢與喟然有生與死同志同傳之歎俯仰歲月又已過二十年而歷歷如昨日事嗟乎此生餘日雖欲復見如夢與者其可得乎古人之碎琴靈床猶不足以喻此懷也長源請余爲墓銘而欲舉筆淚先映睫至今因循負亡友多矣今始畧掇其槩而不欲溢且繁者亦體君退讓之志也嗚呼歎矣銘曰維文暎之麓是爲清士幽宅有來千億疇敢毀轍

信川郡守李公墓碣銘

並序

公諱世會字際仲龍仁李氏高麗太師吉卷之後曾祖諱士慶司諫院大司諫祖諱後山開城府留守兩



世俱贈吏曹判書考諱舜岳司饗院僉正贈吏曹參判妣坡平尹氏忠敬公文舉之女公己巳登司馬兩試乙亥除麒麟道察訪歷司贍宗簿兩寺主簿庚辰由工曹佐郎除振威縣令辛巳乙酉連丁內外艱服闋由掌苑署別提除昌寧縣監三歲遷大丘府判官又三歲棄歸乙未除戶曹佐郎明年移工曹正郎旋除信川郡守又明年十一月十三日卒于任享年六十一始厝楊州甲辰移窆于加平朝宗縣蓮洞村西坐之原公豐貌而偉幹儀觀儼然一見可知爲厚德長者人也性孝友自幼未或違親意親疾方盛寒澡

浴行禱其居憂已向衰而大暑不脫衰絰女奴不敢近聖室伯氏溫疾蚤沒躬含斂盡其誠拊誨孤姪俾有成立以及宗黨戚姻敦睦寬厚窮者如歸未嘗論人長短子弟或客去而議其後則輒呵之曰此薄行之甚者也朝廷得失時論是非一切不出口自少跡不及館學平生真實冲素日以書史自娛間或弄翰墨時對親友引杯吟諷風流弘長於家人產業泊如也居官尤簡廉約己以御下不事鞭扑恥要譽求赫赫聲地部時兼管別營所餘米一斗不以入家然而猶不樂久居求移水曹在昌寧備穀賑飢褒聞賜馬



既遷而穀尚多餘吏白非舊簿所載不必錄公不許  
大丘有白金官杯主者失之既自償而失者得則官  
予其直而兩用之及公歸吏以新杯非舊有而公又  
喜酒納于內公聞而嚴斥之屢典郡邑而歸輒賃屋  
而居無一畝之增於舊者舉斯數事而其餘可推也  
公既文學優長早見推於士友皆期以遠到而竟諱  
於甲乙書尤得晉人體楷草俱可法公之亡也族父  
大憲公喬岳誅之曰書不如文文不如人知公者咸  
以爲知言云配南陽洪氏同知敦寧府事受濂之女  
有婦德生後公二歲壽八十七而沒祔于公墓舉一

男二女男宜濟縣監女長適進士韓鼎朝次適右議  
政鄭羽良縣監二男普輝普燁皆才而天又無後取  
族孫趾祐定祐爲其後一女婿成德游韓婿五男命  
駿命夔命鳳命麟命龜三女婿李昌師林 夏俱士  
人鄭昭儉佐郎鄭婿三女婿參判金尙喆士人李龍  
運修撰李聖圭噫公於拓基爲從舅而與吾先君最  
相善深相契許拓基自髫髻又蒙公知獎不尋常心  
慕悅不敢忘今宜濟託余以銘公墓何敢以不文辭  
就家牒謹掇其大附以常日所聞見仍爲之銘銘曰  
猗公器度寬且毅嗟公詞翰炳而蔚譬彼榘楠挺羣



卉蚤夕登顯世咸謂低徊拙宦限守尉柅蠟涓涓多  
鼎貴時命無奈堪一愼刻銘幽墟眎罔旣

弘文館應教申公墓碣銘

並序

今上初元屏黜羣壬進用舊臣教曰聞故應教申  
哲死於謫予甚悼之攸司復其官其亟別致賻蓋異  
數也公字聖與系出平山自幼已嶷然九歲丁母憂  
哭泣如成人已卯舉進士游黌舍見推士友壬辰除  
明陵參奉選移世子翊衛司洗馬由侍直陞司  
宰監主簿丙申以工曹佐郎出監青山縣適大饑癘  
單心賑拯捐俸蠲賦方伯御史交狀褒聞命敘右職

民亦鑄鐵頌廉德丁酉移大丘府判官戊戌登庭試  
文科明年召以司諫院正言上疏陳沿道民瘼且言  
通信使供億爲一路鉅弊宜令另飭並蒙採施又劾  
數臺官之不叶人望者上褒以公心先是朝議欲  
城蕩春臺以連北漢而又有言其非計者命詢公卿  
三司公言京都旣不可守則北漢不足恃北漢不足  
恃則蕩春尤不可城今北漢規模畧成宜劃屬軍門  
或畿營且以經營北漢之功移之於江都南漢而增  
修之則可爲緩急恃仍言經理廳專爲築城而設而  
貸京外錢穀牟利取贏任其事者皆駟儉奸細低抑



物價宜一切罷之蕩春不果城而經理廳竟不得罷人至今恨之差守禦廳從事官一爲侍講院文學三爲正言再爲司憲府持平時 景廟代理因微事叱退承宣上書陳戒 東宮旣優答 大朝亦下教獎之兼籌司郎以兵曹正郎差書狀官赴燕禮部官聞其善筆法願得之謝不許所例賚盡散一行 景廟新卽位上疏極陳繼述之道仍言今此喪制雖遵古禮而朔望陪祭外雖直禁省者不得一入臨請亟正哭臨之制亦依朱子定論曾經侍從專奏事者皆令受杖且伏聞 宣政殿設殯實有 大行遺旨則到

今不可遺棄請於 因山前擇吉移殯仍劾武臣尹就商慢蹇 上並可之獨移殯以議不咸不得行冬選吏曹弘文錄移弘文館副校理間爲獻納兼東學漢學教授書進 列聖御製跋文賜馬辛丑連拜吏曹佐郎正郎獻納校理應教兼校書館校理帶三字銜差 肅廟實錄都廳郎與聞筆削秋除司諫時 景廟承 慈旨定國本今 上由潛邸陞儲位宰臣鳳輝投疏熒惑語絕悖偕大臣三司合辭請鞠旣蒙準旋改遠竄又以兼弼善疏爭之歷宗簿司僕兩寺正執義書進 王世弟教命文又賜馬冬有雷異以



知不足齋叢書 卷九  
應教上劄言 殿下恭默太過或欠振發仁恕有餘  
或歉剛斷法講久輟引對亦罕懋學講磨已閣一邊  
廷僚玩愒無所猷爲民憂國計置之相忘如是而可  
以爲國乎如柳鳳輝之肆行凶逾而邦憲不伸李鳳  
徵等之干犯倫紀而恩宥混加遂使罪魁假息於牖  
下凶孽洗名於丹書王綱職茲墜廢人心無所懲畏  
豈不痛心願惕然改圖克自奮勵頻開經筵廣接臣  
僚以示警動振作之意仍飭百工一心協贊毋若前  
日之悠汎焉是時 上命 世弟聽政百僚庭籲未  
蒙許 上教愈懇遂議輟庭籲遞爲司諫復還玉堂

言承旨鄭亨益言事被譴宜牽復至冬末逾臣一鏡  
等上凶疏禍機叵測亟封章痛陳其情狀批不下而  
鏡賊輩遂闖入朝象一變亦被削黜屏居驪州先壟  
下杜門却掃以書籍自娛日拜墓風雨亦不廢癸卯  
以議罷庭籲時唯諾爲罪而並遠竄聞命卽日一奴  
控馬怡然就道押隸請少留治行則曰 王命不可  
濡滯七月至善山謫所甲辰四月感異夢命家人理  
終事曰吾將死矣未幾疾劇遂以閏四月十日卒享  
年四十四臨終無一言及他侍者問以家事則曰伯  
氏在矣歸葬于府使公墓左後某年移窆于忠州某



山某向原上祖崇謙高麗元臣我朝簪組相承高祖諱欽領議政諡文貞曾祖諱翊全禮曹參判祖諱啟禮曹判書諡文肅考諱瑞華長城府使妣安東權氏奉事誨之女公沈整伉厲口不出俚語身不設惰容又淡於貨色事府使公愛敬備至其有不安節則憂形於色殆忘寢食藥餌必親執府使公素嚴雖子弟少假以顏色而常稱之曰孝子迨疾革刺股進血事繼妣一如所生既終喪語及猶涕先忌澡浴坐而竟夕以將事每痛早失怙恃不及養推以及於兄弟尤加意於姊妹之嫠窮者俸祿必分在謫聞伯氏病

就晨夜露祈乞以身代待庶母撫庶弟各盡其道少肆力爲學於經史諸子染指殆遍晚喜性理書耽玩不已於文主於達而亦不失規度善於駢儷人多傳誦才長理煩自其少時前輩名公謂可任文苑度支大丘劇邑也簿訴雲委而聽斷如流亦不廢佔俾厭紛華喜簡約田園不增一畝妻孥內困而不以經意立朝持論雖不爲己甚而至於義利之辨確乎有不可奪者秉銓筆一主公嚴正言時所劾一臺官人多言其可惜則卽復通擬不以爲難至於義所不可雖強要之至相迫亦毅然不少撓與人交見不是則面



斥之不爲顧中實坦夷多誠悃遇會心人清談軟語  
翰寫無所間人以是尤親愛之工八法爲世所稱配  
延安李氏主簿泰朝女應教有相孫有婦德耐墓左  
舉四女無男取伯氏次子景閔爲嗣仕止府使女適  
大司諫閔百行士人元景游府使柳恕士人俞彥鈐  
景閔又無男取其弟景雍子某子之二女婿洪述漢  
金鍾善閔無育元繼男某柳一男某俞繼男漢寧公  
之通材偉器實罕儔匹一時儕友皆出其下而遭值  
艱屯齋志入地余少於公十年兄事之交誼甚篤今  
獨踽踽暮塗孰與討盡平生嘻其悲矣銘曰

文足煥猷材足膺務公輔之望廊廟之具清塗華貫  
高驥濶步而公且卿孰敢抵牾天運紛紜時命錯互  
坐隅鵬止絕壑桂蠹世又三絕理尤罔諭後死之悲  
銘以寘墓

忠勲府都事贈吏曹參議李公墓碣銘 並序

公諱週字復初系出璿派 世宗別子廣平大君章  
懿公諱璵是生永順君諱溥策兩勲諡恭昭又二世  
至郡守諱漢縣監諱仁健郡守諱郁於公爲高曾及  
祖皇考諱厚源策靖社勲右議政完南府院君諡忠  
貞妣光州金氏參判槃之女沙溪文元公長生之孫



知不足齋叢書  
卷九  
公二十八以忠貞任仕爲水庫別檢陞造紙署別提  
除奉化縣監以銓嫌不赴歷翊衛司翊贊司禦除安  
峽縣監居五歲丁忠貞憂服闋自儀賓府都事歷平  
市署令忠勲府都事除永柔縣令五歲而遞拜司圃  
署別提病未就已酉除江西縣令又六歲辭歸公爲  
人和厚恭勤事父母友諸弟盡其誠無一毫傷人害  
物意一時知公者皆稱公善人任職內外務存大體  
不察察於細故在邑聽訟甚公訟者咸願歸公焉甲  
寅以後羣壬滿朝以忠貞公素宗主善類忌嫉之已  
甚且以公弟芝湖公選繼忠貞立朝持風裁盡言不

顧益懷憾久欲一逞於公家適江西守姓金人承羣  
壬指且與公在任時奸吏之被重罪者締謀搆捏賊  
臣宗道時爲道伯亦自蓄怨於忠貞與芝湖者樂聞  
而助成之公遂就理歲餘流于碧潼郡時芝湖公已  
先竄于龜城矣己未秋繼妣辛夫人值 車駕出郊  
上言訟二子非罪並謫乞宥還其一以靠餘年該府  
覆奏特不可 上特命公減等量移于海西之殷栗  
縣公在潼已示憊登途疾益甚十一月十五日至安  
州旅次竟臯復春秋五十五庚申正月永窆于廣州  
光秀山先兆坐壬之原後以嗣子鳴寃命還職牒復



用曾孫及孫貴累贈至通政大夫吏曹參議配延安李氏戶曹判書時昉之女左贊成忠定公貴之孫賢明莊重忠貞公最愛之亦贈淑夫人祔葬墓左一男山輝縣監三女婿長金介臣次尹道明次洪禹翰郡守孫涉贈參判酒郡守溲府使滄觀察使曾孫顯祿大司憲次顯福顯國顯億顯喆縣監顯發進士顯白奉事顯甲顯吉內外孫曾玄男女多不盡記都憲子權中府使有子商舟縣監來請銘噫公既早登仕籍歷典三邑俱有成效而遽罹否運羣憾參會經歲幽圉遠謫邊陲內消外鑠中途不淑豈非命歟然而公

歿未幾丹書昭洗有孫若曾追榮九原公於是乎無遺憾矣銘曰

王室之裔鍾鼎其世資又易良命奚不臧天鑒回照哀贈再耀繼繼雲仍遺慶斯徵

司諫院大司諫李公墓碣銘 並序

牛峰李氏高麗侍中公靖之後入我朝簪組相望至諱有謙戶曹參議生諱翮右議政生諱晚昌成均進士生諱緯左參贊學者稱陶菴先生聘南陽洪氏僉正禹賢女舉一男諱濟遠字毅甫幼而豐盈沉深四歲患痘濱危陶菴公夢老人謂勿憂也兒必貴而



多福果卽甦少長課學不怠文詞蔚然丙辰冬擢謁  
聖文科卽拜藝文館檢閱嘗夜對宣醞 上教曰聞  
李某之父以閔氏外孫善飲酒某亦必善飲仍命連  
酌對以父命無過三杯則 上曰君命亦重爾父聞  
之必不責命連飲過六七杯始止之實異數也已而  
陞六品西敘副司果選都堂吏曹錄仍拜弘文館副  
校理兼侍講院司書帶三字銜差別兼春秋旋除北  
評事掌試以公北人咸稱前後一爲副修撰修撰兼  
校書館校理中學教授司憲府掌令再爲副校理校  
理吏曹正郎七爲司諫院獻納差沃川按覈御史俱

不就一拜京畿都事兼文學輔德軍資監正癸亥爲  
養除衿川縣監邑有高麗忠臣徐掌令甄墓而蕪沒  
無標識乃請陶菴文刻石而躬祭之又令士民子弟  
自八歲至十四自十五至二十能讀小大學者錄其  
名曰講生勸課講誦月月賞罰以勸懲之殆一年頗  
有作興之望又以良丁少而軍額多報巡營將以變  
通而不及也乙丑除安城郡守立殉義碑于壬辰義  
兵將洪季男戰壘以表之倣栗谷先生舊制損益成  
學規遍諭一境俾行之是冬擢水原府使陞通政階  
至未幾上司令行操鍊以春窮民饑請待秋被譴罷



盖三宰畿邑爲政寬而確有犯者不饒奸猾自戢大小國役官自拮据不使民知之吏民久而猶懷安城人立碑以頌之丙寅丁陶菴憂制閩連除判決事大司諫承旨兵曹參知俱辭一拜兵曹戶曹參議嘗以大司諫上章言壬獄之慘尙忍言哉其誣逼之計不止於戕殺諸臣是以 聖上曾若曰此卽戊申嚆矢大逾張本載籍以來所無者 聖教旣如是明白嚴正則鍛鍊此獄者宜卽勘正而訖今幾年無所舉論削勲燒案之後一番懲罪之請卽今日臣子不可已者目今義理不明習俗壞敗國綱朝象可憂非一正

名立紀莫先於此也不報掌令任師夏言諫長此論其義則正其言則是豈可忽棄而莫之省納也相臣諉以 大駕幸溫時兩司不備請罷在外者 上又下嚴旨並師夏特罷之玉堂陳劄請寢而亦不聽壬申正月二十六日朝起忽痰壅暴卒享年四十四始葬水原再遷而永窆于龍仁某山某向原夫人豐山洪氏同知敦寧府事重福之女舉五男七女男長木早天次禾縣監次未出爲從曾祖判書公後錄任爲參奉亦天次來次采女適徐翼修金健柱金斗南南一者趙秉鎮鄭元綏一未筭侯事父母未嘗違其意



爲親瘠屢入山治藥法宜齋潔當祁寒亦必澡浴只  
一妹友之深或久留舅家每問其歸期旣沒語及之  
必泫臉雅素儉約不治鞍馬衣服待窮族曲有恩意  
一毫無求於人旣除陶菴喪奉母夫人自寒泉墓廬  
就居高陽舊墅猶不忍離側從窻暫入卽歸歸則怡  
愉昕夕備養志物常曰幸賴祖先德蔭幼稚滿前眇  
福實深兢懼今何可有志進取以招損也案常有一  
部小學每誡諸子曰此是吾家法門吾先子每朝必  
講是書今不宜廢前規日起晨謁廟後輒令諸子侍  
讀數板噫侯旣早承詩禮教富有文藝妙歲發軔聲

望出人名塗華貫敷歷殆遍使之天假以年則乃公  
乃卿庶幾乎匡翼世道而秩纔緋玉壽不及中身嗚  
呼此曷故焉無或嗇於今者將收報於他日歟銘曰  
幼服庭訓藉甚士友早躡雲路望傾朝右具茲衆美  
佇必大受而遽止斯寔命不偶豈其遺羸歸成在後  
銘于幽隧昭眎永久

泮陰老人自銘

泮陰老夫杞溪俞氏名曰拓基展甫其字曾祖及祖  
觀察都憲禰位牧使俱有勲典外翁正言龍仁之李  
辛未以降甲午登第翰苑春坊薇垣玉堂銓郎中書



殆遍歷敷憂吉祈養暫出淮陽贊价燕路竣還晉秩  
凶誣繼發萊山乃蔡乙巳恩召參修國史諫長銀臺  
吏兵禮議持節嶺南朞而病遞槐院籌司虛兼副提  
俄值大往屏跡江寓湫灘逆亂鎮禦東路再擢北臬  
辭輒被謫白葵憂危勉承沁鑰屢違除旨責補唐城  
粗訖荒政仍移海營猥叨輔養轉差 宮賓廟薦京  
尹滋益逡巡申命按嶺譴與恩殊歸拜司徒遂長金  
吾明歲入台齒猶未艾負乘戒昧疾顛憂大退伏漢  
野十閱冬夏間趨嘗藥時赴慶賀奄丁大故屢蒙恩  
顧愚驂膠固朝竄夕宥奉使于藩義重往役忽叨元

輔適際艱棘甫及半載終致覆餗前後再黜亶由迷  
滯年至許休異恩下逮歷事 三朝涓埃莫酬重厚  
謹慎 袞褒徒紆撫念平昔尤悔山積老病日深墓  
門期迫自識短石俾表窀穸聘于申氏平山其籍中  
丞長女忠景之孫長以二歲性則淑均生與偕老逝  
將同穴男女孫曾留俟續綴



知守齋集卷之九

知守齋集卷之十目錄

墓誌

始祖新羅阿飡府君墓誌

十三世祖考版圖判書兼漢陽府尹府君墓誌

十二世祖考版圖判書府君墓誌

十一世祖考判司宰監事府君墓誌

十世祖考贈承政院左承旨府君墓誌

九世祖考成均進士贈吏曹參判府君墓誌

九世祖妣贈貞夫人朴氏墓誌

八世祖考僉知中樞府事贈兵曹判書府君墓



誌銘 並序

七世祖考禮曹判書贈議政府左贊成景安公  
府君墓誌

六世祖考戶曹判書肅敏公府君墓誌後記

五世祖考慈山郡守府君墓誌追記

高祖考贈吏曹參判府君墓誌

先妣貞敬夫人李氏墓誌

咸鏡道都事俞公 好曾墓誌

孺人洪氏墓誌

議政府右參贊任公 望墓誌銘 並序

仲子婦淑人沈氏墓誌

成均進士李君 昌鎮墓誌銘 並序

成均進士贈左贊成俞公 涵墓誌

敦寧府都正趙公 榮祐墓誌銘 並序

幼孫文達壙誌



知守齋集卷之十

墓誌

始祖新羅阿飡府君墓誌

嗚呼此為我始祖新羅阿飡俞三宰府君衣冠之藏也阿飡官高故亦稱三宰或曰三宰即其諱而非職號云阿飡之後有曰義臣羅亾自以前朝世臣不肯屈麗祖怒降屬杞溪縣戶長子孫遂為杞溪人杞溪今隸慶州府公之葬在府治北五十里杞溪縣堂洞壬坐之原中為土人所占有失其處 肅宗乙卯始得之丁巳諸宗理于官事益白己巳後孫夏謙尹于



慶改封築豎短標庚寅後孫命弘爲方伯創墳庵募僧守之置祭田俾後裔居近者歲一祭丙午拓基叨觀察又刻大碑而樹之竊念墓之必有誌古也况塋域所在前旣失而復得之則又安保後之不如前乎是用燔薶而埋于幽堂之南以備千百年後或有之攷焉祇是年代遙邈乘牒無徵生卒年歲官位踐歷與夫立朝功烈茫然未得以詳焉惟後承蕃衍至今將千年其得姓而書名家譜者殆千數外裔之繁又過之名德冠冕相承而未艾我 仁獻 仁烈 仁宣 明聖 端懿五王后亦皆自出於府君之世泉

醴房芝可徵其源根猗歟休哉戶長公之後有曰諱成美攝戶長曰諱晉卿貢進士曰諱汝諧及第司宰主簿同正當崔沆執國命作詩譏之竄海島事在麗史自同正滂至府君爲五代而譜者猶多失世次云同正生諱得瑄尙乘局內丞追封左僕射僕射生諱儋版圖判書兼漢陽府尹於拓基爲十三世祖而凡我諸宗之散在中外者皆其後也是爲誌

十三世祖考版圖判書兼漢陽府尹府君墓誌  
公諱儋姓俞氏官奉翊大夫版圖判書兼漢陽府尹  
考諱得瑄尙乘局內丞追封左僕射妣衿川姜氏軍



器主簿渭忠女祖諱汝諧司宰主簿同正祖妣安康  
盧氏檢校軍器監源女同正公當高麗高宗朝權奸  
崔沆顓國與河東監務盧成等作詩譏之遂謫海島  
事見麗史自同正公游而上之有諱晉卿貢進士有  
諱成美攝戶長有諱義臣高麗代羅自以前朝世臣  
不肯屈麗祖惡之降屬杞溪縣戶長子孫遂爲杞溪  
人杞溪今隸慶州府始祖俞三宰新羅阿食自始祖  
至同正公爲五代而譜者猶多失其世次云始祖墓  
在慶州府治北五十里杞溪縣堂洞坐壬之原戶長  
公以下五代葬地失不傳自公墓始世世封樹香火

不絕公墓在水原府薛倉青龍里馬耳山乙向原舊  
有表久而泐後孫命健莅旁縣改豎焉夫人迎日鄭  
氏及第之純女男長承桂亦官版圖判書次禪謹爲  
僧麗朝崇佛教公卿家有數子輒捨其一出家時俗  
然也次承原無后女婿朴某判書長男千慶典書次  
成利判軍器寺事次成保副正次成福判司宰監事  
三女婿周彥臣宋希玉柳灝柳牧使千慶男順郎將  
次侃成利長男顯工曹典書次俊禮曹正郎孫孝通  
提學會孫牧老直講卿老縣令公老縣監臣老典籍  
玄孫仲翼司諫成保男賁成福長男輯贈承旨次憲



知守齋集卷十  
生員輯男解進士贈參判解男起昌僉知中樞府事  
贈判書是生五男二女男長舜舉判官次汝弼次汝  
翼別坐次汝霖禮曹判書諡景安次汝舟處士女婿  
大司憲柳世琛贈牧使洪世弼景安男絳戶曹判書  
諡肅敏自公至肅敏又七世而門戶益大顯及今內  
外支裔殆不勝計以名德功業稱者前後相望嗚呼  
盛矣唯是年代已邈譜乘多軼公之生卒歲月歷任  
多少暨立朝事行茫然未有所傳只畧記先系與後  
承納之玄竈以徵來後云

十二世祖考版圖判書府君墓誌

惟我杞溪俞氏咸祖於高麗版圖判書兼漢陽府尹  
諱僖至今十三四五世而益蕃以大書名譜牒者幾  
千數而外裔之盛又倍之其以名德功烈聞於世著  
於國史者殆不勝述判書公墓在水原府薛倉青龍  
里馬耳山娶迎日鄭氏及第之純女有三男而仲出  
家季無後公序居長諱承桂亦官奉翊大夫版圖判  
書配貞夫人新平李氏父正郎光弼祖監務挺曾祖  
鄉貢進士承柱公墓在安城郡玉嶂面大門里防內  
洞未向之原與夫人墓爲上下墳嘉靖乙丑六世孫  
絳爲京畿觀察使刻石以表之祇是幽堂之誌尙未



遑焉謹畧敘先系與後承埋于壙南以徵于來世公  
始祖俞三宰新羅阿食墓在慶州杞溪縣堂洞其後  
有諱義臣羅亾自以世臣不肯屈麗祖惡之降屬杞  
溪縣戶長諱成美攝戶長諱晉卿貢進士諱汝諧及  
第司宰主簿同正作詩譏權奸崔沆謫海島事載麗  
史於公爲曾王考生諱得瑄尙乘局內丞追封左僕  
射於公爲王考公有四男長千慶典書次成利判軍  
器寺事次成保副正次成福判司宰監事三女婿長  
周彥臣次宋希玉次柳灝牧使典書男順郎將次侃  
女婿司果金乙龍判軍器男顯工曹典書俊禮曹正

郎女婿朴潤福孫孝通提學會孫牧老直講卿老縣  
令公老縣監臣老典籍玄孫仲翼司諫副正男賁判  
司宰男輯贈承旨次憲生員承旨男解進士贈參判  
孫起昌僉樞贈判書曾孫舜舉判官汝翼別坐汝霖  
禮曹判書景安公汝舟處士景安男絳戶曹判書肅  
敏公孫泓左議政忠穆公嗚呼公旣仍世大顯繼掌  
邦賦則其官歷功伐必多可紀而家乘國史軼不之  
傳並與生年卒歲而昧昧未有攷焉寧不爲後人無  
窮之恨哉是爲誌

十一世祖考判司宰監事府君墓誌



公姓俞氏諱成福杞溪人始祖俞三宰新羅阿冷其  
後有諱義臣羅亡不肯屈麗祖降屬杞溪縣戶長又  
其後有諱成美攝戶長諱晉卿貢進士諱汝諧及第  
司宰主簿同正同正生諱得瑄尙乘局內丞追封左  
僕射僕射生諱僖版圖判書兼漢陽府尹判書生諱  
承桂亦官版圖判書寔公之考也妣新平李氏正郎  
光弼女生四男公居其季官止奉順大夫判司宰監  
事配令人李氏亦貫新平知郡事上垣女署令弼孫  
中郎將桂曾孫署令高凝外孫公墓在安城治東陪  
御里丑坐之原與令人葬爲上下墳嘉靖乙丑五世

孫絳爲京畿觀察使刻石以表之久而折傷乙卯拓  
基以黃海道觀察使改豎焉惟是同正公之譏斥崔  
沆竄海島旣在於高麗高宗之四十三年則判書公  
兩世登顯必當在忠烈忠肅二王朝而公之仕又不  
出乎麗末國初之際然家傳乘牒散逸不傳不但年  
代高下歷任多少今莫可詳並與生卒歲月亦不能  
記只敘先系于上而仍畧記後承于下以備來世之  
徵焉公二男長輯贈承旨次憲生員承旨次男解進  
士贈吏曹參判生起昌僉知中樞府事贈兵曹判書  
是生五男二女男長舜舉軍器寺判官有子璟察訪



次汝弼無後次汝翼別坐無男有三女次汝霖禮曹判書景安公有四子綰贈領議政縝瑞興府使絳戶曹判書肅敏公綸進士次汝舟處士有子緯將仕郎二女婿大司憲柳世琛贈牧使洪世弼議政男灝縣監泓左議政忠穆公洵縣令出後察訪肅敏男泳郡守涵進士出後府使將仕男浚至今內外支裔殆不可搜數其以名德功業著于國史者亦甚多嗚呼茲豈非積德累善之餘庥也哉公考判書公墓亦在安城南玉嶂面大門里自公墓南距不十里而近云

十世祖考贈承政院左承旨府君墓誌

俞氏出杞溪始祖新羅阿飡俞三宰其後有諱義臣羅亡不屈爲戶長諱成美攝戶長諱晉卿貢進士諱汝諧及第同正同正生諱得瑄副內承是爲公高祖內承生諱僖僖生諱承桂俱官版圖判書於公爲曾祖祖考諱成福判司宰監事妣新平李氏知郡事上垣女署令高疑外孫公諱輯追贈通政大夫承政院左承旨兼經筵參贊官表德與生卒年歲俱不傳夫人長髻吳氏縣監成祐女公墓在安城郡北蘇萬里午向原與夫人合窆有二男一女男長淑生起敬起孝起仁起義起禮季上將次解進士贈吏曹參判生



起昌僉知中樞府事贈兵曹判書女婿參軍宋侗判書四男二女男長舜舉判官次汝弼無后次汝翼別坐次汝霖禮曹判書諡景安自公以下三世之贈皆以其貴也次汝舟處士二女婿大司憲柳世琛贈牧使洪世弼判官男察訪璟女婿郡守尹光齡別坐四女婿金文伯部將趙匡臣縣監李貴長權琮景安男縮生員贈領議政縝府使絳戶曹判書肅敏公綸進士處士男緯將仕郎今爲十二世三世益蕃以昌簪組連縣香火不廢惟是幽誌未具茲謹畧記先系與後承納于玄窰之南以備他日之徵信焉

九世祖考成均進士贈吏曹參判府君墓誌

我俞氏遠有代序以新羅阿飡俞三宰爲始祖其後有諱義臣羅社旣屋自以前朝世臣不肯屈麗祖惡之降屬杞溪縣戶長後人仍著籍杞溪公諱解高祖諱僖曾祖諱承桂俱官版圖判書祖諱成福判司宰監事考諱輯贈左承旨妣長馨吳氏縣監成祐女公聘竹山朴氏其考縣監禮有三男五女成摠管勝夫人最長而公之配序居第七仍贅居于洪州之朴氏鄉弱冠中司馬性恬靜不求聞達不幸早世只有腹子未分其男女朴氏家哀而葬之于其所居赤洞午



向之原赤洞一名魯恩洞朴縣監成摠管及摠管子成先生三問之夫人墳亦俱在公墓左麓及腹子生曰起昌長而舉武科僉知中樞府事燕山朝非罪竄海島中廟改玉屢除官終不起公表德與生年卒歲俱無傳只傳享年二十四諱辰乃六月二十日而僉樞公生於正統丁巳則公之下世必在丙辰丁巳間而自丙辰丁巳滂計二十四歲公之降實在於永樂癸巳甲午中卽我太宗世也僉樞生五男二女男長舜舉軍器寺判官有子璟察訪女婿尹光齡郡守次汝弼無后次汝翼別坐有四女婿金文伯趙匡

臣部將李貴長縣監權琮次汝霖禮曹判書景安公推恩贈公嘉善大夫吏曹參判兼同知義禁府事朴氏貞夫人僉樞亦贈兵曹判書有四子縮生員贈領議政縝府使絳戶曹判書肅敏公綸進士次汝舟處士有子緯將仕郎二女歸大司憲柳世琛贈牧使洪世弼今至三百餘年內外雲仍益蕃達官聞人殆不勝計吁其盛矣議政男左議政忠穆公泓按湖西時豎短表而幽誌則尙闕焉謹敢畧記納于壙南朴夫人別葬于庇仁縣北通方洞未向原別有誌

九世祖妣贈貞夫人朴氏墓誌



夫人竹山村氏高麗太保奇晤之後高祖諱德龍上  
護軍曾祖諱純摠郎祖諱仲宜典客副令考諱禔安  
峽縣監外祖署令全義李珍幹縣監公有三男五女  
夫人序居第七既長歸于俞氏爲成均進士贈吏曹  
參判諱解之配參判公杞溪人考贈左承旨諱輯祖  
判司宰監事諱成福曾祖版圖判書諱承桂高祖版  
圖判書兼漢陽府尹諱僖外祖縣監長髻吳成祐參  
判公弱冠中司馬二十四不幸早沒葬于洪州赤洞  
午向原朴縣監及其長女婿摠管成公勝成公子承  
旨三問之夫人墓亦俱在參判公墓左麓參判公沒

時無所育只有腹子生于正統丁巳諱起昌夫人能  
自力持家教以義方俾有以成立既長登武科歷典  
九邑官止僉知中樞府事夫人備享志物之養嘗從  
之扶安縣任所疾卒將歸附于赤洞參判公兆次鞠  
過庇仁縣北通方洞有異徵且用形家言遂葬其丑  
坐之原距赤洞百里而遠惟生卒年歲俱無傳僉樞  
公燕山朝非理竄海島 中廟反正屢除官不起終  
老於庇仁縣卒葬于縣之東齋宮里午向之原距夫  
人墓僅十里娶綾城具氏參軍安遇女舉五男二女  
男長舜舉判官有子璟察訪女婿郡守尹光齡次汝



弼無後次汝翼別坐有四女婿金文伯趙匡臣李貴長權琮趙部將李縣監次汝霖禮曹判書景安公參判公及夫人之贈以其貴推恩僉樞公亦贈兵曹判書有四子綰生員贈領議政縝府使絳戶曹判書肅敏公綸進士次汝舟處士有子緯將仕郎二女歸大司憲柳世琛贈牧使洪世弼內外後屬甚盛且顯登名譜牒者多不可記八世孫命弘按嶺藩刻表而豎之今輒畧記先系與子姓燔誌埋之于壙南以憑淵實之攷云

八世祖考僉知中樞府事贈兵曹判書府君墓

誌銘 並序

公諱起昌字子盛姓俞氏始祖俞三宰新羅阿飡遠祖諱義臣麗祖代羅不肯屈降屬杞溪縣戶長其後遂爲杞溪人有諱汝諧及第主簿忤權奸崔沆謫海島事見麗史有諱僖版圖判書是公五世祖也高祖諱承桂亦版圖判書曾祖諱成福判司宰監事祖諱輯贈承政院左承旨考諱解成均進士贈吏曹參判妣竹山朴氏縣監澹女亦贈貞夫人參判公二十四早世時公尚在腹及生而朴夫人保養以成立之成先生三間於公爲姨兄而同居于洪州之赤洞公自



幼從遊其相慕用長益以名節自砥礪由武舉進典九邑陞通政階爲僉知中樞府事燕山主昏虐先朝大臣多僇死用收司律公亦坐成相國俊親黨謫珍島時有二朝士同竄在一島久之使者從日下來次第賜二朝士死家人日夕危懼謂公且不免一日有急脚自京至至卽氣竭仆地不能起家人驚惶審其貌乃公舊蒼頭也探其囊 中廟靖國以兵曹參議召公而公之男汝霖時爲翰林送教旨及玉巾圈一雙公爲之設位而北向痛哭曰置吾君於何地遂徑歸于庇仁先墓下優游終老除命屢降而竟不復

起正德甲戌壽七十八而以十月四日卒治命題主以僉知舊職葬于庇仁縣東齋宮里午向之原夫人綾城具氏參軍安遇女司直資孫中郎將賢輔曾孫司正長馨吳成侑外孫祔葬公墓左舉五男二女男長舜舉判官有子璟察訪次汝弼無後次汝翼別坐無男有四女次汝霖禮曹判書諡景安有四男縮生員贈領議政續府使絳戶曹判書諡肅敏綸進士次汝舟處士有男緯女長適大司憲柳世琛以節烈旌其門次適贈牧使洪世弼今至九世十世內外支裔殆不可勝計只記得姓而籍文譜者左議政忠穆公



泓大司諫大建參議大進參判大禎觀察使昔曾承旨晉曾弼善守曾參判忠景公伯曾院正學會著作樟判書夏益承旨夏謙博士命鼎佐郎命哲持平命咸都事世重參判健基承旨彥國議政公派也府使大脩郡守大徹都事好曾觀察使省會觀察使槐大司憲檄參判文忠公榮都承旨樞校理命胤府尹命一右參贊命雄判書命弘觀察使命凝承旨宇基右參贊寂基領議政拓基持平彥明承旨彥通正言彥協參議彥述校理彥好承旨彥民參議漢蕭肅敏公派也以景安貴推恩贈公資憲大夫兵曹判書兼知

義禁府事夫人從贈貞夫人公墓舊有短表卽嘉靖中肅敏公爲本道觀察使忠穆公爲修撰時所刻豎在公卒後四十餘年而距今將二百歲蓋亦久矣表但云公性清白外嚴內寬歷試九郡皆有聲績燕山朝見謫自是不復仕退居庇仁縣常以游獵爲事中廟朝屢官不起爵祿可辭公實有焉嗚呼賢矣哉噫其文不甚言其可言者又無作者名然而其辭微而顯亦可以槩萬一矣 肅宗癸巳湖右章甫建祠于公墓下揭其號曰清節以祀公而又以景安公正色昌言斥邪邁悶配食于公權文貞公忤復撮公遺



蹟刻之于墓石公之事至是而始大著豈亦始終顯晦有所待而然歟唯是幽堂之誌蓋將俟淵實而徵焉尤不可以已者而于今文既無傳疑古或所未遑謹掇家傳舊聞燒菴納于壙南仍系曰  
世昏而順俟其命時清而潛晦其跡皎皎乎烈烈乎如其清如其節於戲是爲權文貞特筆大書乎七尺之碣者後百世而欲知公尙觀於斯余小子何敢述也

七世祖考禮曹判書贈議政府左贊成景安公  
府君墓誌

公諱汝霖字啓沃俞氏著籍慶州之杞溪縣以新羅阿飡俞三宰爲始祖歷高麗及我 朝冠冕相承有諱僖版圖判書生諱承桂亦版圖判書生諱成福判司宰監事生諱輯贈承政院左承旨生諱解成均進士贈吏曹參判生諱起昌僉知中樞府事贈兵曹判書三世之贈以公貴也僉樞聘綾城具氏參軍安遇女以成化丙申生公公幼失恃少長自力爲學不少懈戊午登司馬甲子擢別試及第薦入史局由檢閱至奉教陞成均館典籍轉直講佐韓判書亨允高贊成荆山二公墓咸稱以國器出爲韓山丹陽兩邑守



知不足齋集 卷一  
治理著聞歷司諫院司諫議政府舍人司憲府執義  
侍講院輔德弘文館直提學以宣慰使僨倭差陞承  
政院同副承旨歷轉至都承旨間拜吏曹參議忠清  
全羅二道觀察使丙戌特除司憲府大司憲改授副  
提學三歲不他遷己丑又特旨擢授刑曹判書辛卯  
拜禮曹判書兼 世子賓客轉戶曹爲奸凶所螫遠  
放田里居七年而奸凶伏辜 上教曰俞某可大任  
復召爲禮判兼賓客戊戌移戶判又還禮曹是年十  
月二日卒于位春秋六十三葬于高陽治西五里佛  
巖洞未向之原明年太常議曰公稟性淵洪智慮深

遠外雖冲和而內實剛定榮辱過前憂喜泯形接人  
以誠不事表襮居室澹然不近聲色當其履官規事  
務存大體隱然有古君子之風焉人服其量方以公  
輔期之遽爾卽世惜哉謹按諡法耆意大慮曰景寬  
裕和平曰安請諡之曰景安公教曰可此公歷官之  
始終也已卯靜菴趙文正公爲大司憲與多臺伏閣  
請削靖國功臣濫猥者公亦以司諫合辭共爭未及  
準而北門禍作趙文正諸賢遽下理公屢請同就獄  
受罪而終不能得則遂屏居却掃若將終身久之始  
復舊踐最久於經幄之長隨事陳列前後數十章一



知不足齋集 卷十  
以嚴宮禁杜私逕崇儉約公取捨獎名節明賞罰開  
言路懲貪污輔導 東宮爲急又嘗勸 上畏天以  
弭災咎盡誠以敦孝理明辨忠邪釋冤決滯容直言  
進忠讜存大體整統紀勤勤懇懇於奏劄間者罔非  
對症之良劑揀時之要務也時金安老自詭以保翼  
東宮起謫中顯用日橫恣人莫敢言者李左相苻  
始援而後悔啓請罷斥公與六曹參議以上十數人  
詣朝堂力請從政府所請安老以此銜公尤甚誣以  
罪及下公于獄連日冬霧四塞不辨人人皆異之竟  
鐫公官秩公退寓庇仁松楸下漁釣寄懷書史怡情

安老死始還朝朝議欲籍安老貲產公以爲已甚而  
止之世稱以長者此公進退言議之著於事者也公  
在家盡孝悌臨官務恭恪敷遍華要周歷內外貳省  
長曹所之皆績常以詩人多輕薄罕哦詩然作則必  
工而可吟翫者洪相國彥弼大碑之敘也氣厚而和  
學敏而醇旣文旣識方以居身凝然德器充然儀容  
早振聲華儒林所宗輿望益傾朝野欽風者金慕齋  
安國祭誄之文也 聖主方期舟楫用明廷未展棟  
樑材方祈乘泰運久已踐台階德與名俱重時兼命  
自差者金河西麟厚申企齋光漢相紉之詞也此又



公學識德望爲一代名賢諸公所推服者也 中宗  
親祀 英陵令秩高文臣三人分製祭文而命用公  
所撰則亦可見公詞藻之過於人也惟是徑樹之銘  
雖有洪相所述而其於踐歷班聯旣多簡漏若公所  
罹禍厄又最關於大小往來之幾而畧而不之顯言  
者誠有所不可曉至於節惠之狀幽堂之誌屢經兵  
燹中佚無傳茲又後承之所隱恨而深歎者謹敢不  
揆陋拙考据前輩論述且就史官所記補苴闕畧敘  
次如右公配昌寧成氏成均生員贈判書聃命女弘  
文校理燻孫禮曹參判概曾孫縣令江陵金幅外孫

舉四男長曰綰成均生員贈領議政有三男二女男  
灝縣監泓左議政策平難光國兩勲封杞城府院君  
諡忠穆洵縣令出爲從父後女婿察訪尹重熙生員  
洪濯次曰縝瑞興府使贈左贊成無男以從子涵爲  
後次曰絳戶曹判書諡肅敏有二男泳郡守贈左承  
旨涵成均進士贈左贊成出繼仲父次曰綸無男三  
女婿贈參判洪宗福寺正朴文榮學生金宗儒至今  
八世九世支裔甚多不能盡記只書姓孫之登文科  
者曾孫大司諫大建參議大進府使大脩郡守大徹  
參判大禎玄孫觀察使昔曾承旨晉會弼善守會院



知不足齋叢書 卷十  
正學會都事好會觀察使省會參判杞平君伯會五世孫觀察使忠簡公槐大司憲檄參判文忠公榮著作樟都承旨樞六世孫校理命胤判書夏益承旨夏謙博士命鼎佐郎命哲府尹命一右參贊命雄判書章憲公命弘觀察使命凝持平命咸七世孫都事世重參判健基承旨宇基右參贊竄基領議政拓基八世孫持平彥明承旨彥通正言彥協承旨彥國參議彥述校理彥好承旨彥民九世孫大司諫漢蕭以忠穆推恩贈公崇政大夫議政府左贊成兼判義禁府事世子貳師知經筵春秋館事弘文館大提學藝文

館大提學知成均館事五衛都摠府都摠管夫人從贈貞敬夫人是爲誌

六世祖考戶曹判書肅敏公府君墓誌後記

始我六世祖肅敏公卒而將葬也從子忠穆公泓實誌其幽窆而麗牲之刻久猶未就我曾祖觀察公旣謁文于李月沙廷龜而復請于張谿谷維及崇禎己卯按關東饒而樹之徑則捨谿而取沙當時微意雖未敢隱度而谿谷所撰誠亦不易得之大文字且其發揮揄揚實深勤摯不宜仍遂泯沒謹敢用古人兩誌故事書于菴而納于壙南仍輒畧附碑誌中佚事



於後 中宗昇遐後公以藝文館奉教與檢閱林亨秀舍人趙彥秀副校理李湛應教李滉修撰閔起文盧守慎吏曹佐郎金儲僉正吳祥副正金魯等同差行狀纂集廳郎廳見盧蘇齋日記李正郎仲悅之橫被慘禍也公爲之力懇於陳復昌則復昌拂然而反恐喝見尹月汀根壽所述李公墓碣爲吏郎時金河西麟厚爲養通信見復書所吟詩及洪相國遲挽詞峻節不隨時俯仰冲襟肯許物緇磷俱載本集公按北關時以土俗尙弓馬勅文會堂奉安孔聖遺像選道內儒生二十人廩養厚而勸課勤多士風動絃誦

相望俗爲之一變今將數百年而北儒猶誦慕不衰  
肅廟壬午遂躋享公于文會書院公之節惠之典始舉於 顯廟甲辰而尤庵宋文正公實撰其狀太常議以執心決斷應事有功二法諡之曰肅敏公公元配南夫人祖府使憬曾祖觀察使倫外祖宗室蓮城君澗繼配李夫人系出璿源茂松守億年女淮陽都正孝禮孫栗谷李文成公於夫人爲近戚而其祭夫人文有曰譜系玉葉生稟蕙質擇配于歸爰鼓琴瑟藩垣喉舌賴戒鷄鳴慈如穆姜恨乏寧馨於此又可見夫人之德懿也大衡男長曾五女婿參奉李浩



然進士沈蕃生員柳穉府使朴瑛學生金義生大儀  
男好曾文科都事省曾文科觀察使世曾武科希曾  
郡守三女婿參軍申鈇承旨邊孝誠僉知孟昭大倣  
六男孝曾判官友曾悌曾通政質曾貫曾貴曾守門  
將三女婿判官吳以寬僉樞蘇蕙學生權柁大脩二  
男景曾進士學會文科院正四女婿判決事李悛參  
判李尙信佐郎金善餘學生洪桌大倣一男養曾參  
奉四女婿學生李暉僉知崔義源參奉柳荇別坐鄭  
𧇧大儼三男勉曾縣令爾曾後曾主簿二女婿學生  
韓守良教官金大觀大倣二男得曾縣監勗曾四女

婿寺正趙希進文學柳鞞縣監柳廷禹牧使閔晉亮  
大佑二男企曾次曾二女婿校理沈熙世學生崔進  
源今爲七世八世益蕃而昌內外雲仍殆將累千而  
得姓而以文科顯者亦至二十五人茲實由公之含  
用不盡積慶垂庥吁其盛矣哉

五世祖考慈山郡守府君墓誌追記

公之莅歷事行畧具舊誌家傳公舊第在漢師之北  
部順化坊與朴思菴淳隔垣而居年又差二歲自少  
最相善公於丁卯十一月爲振威縣令時柳眉巖希  
春以校理歷過見公而心許之書于日錄曰主宰俞



某德潛判尹某之子也出祇迎余不受相見對飲食  
談話亦可人也公之見重於先輩名德此可知也鄭  
夫人祖郡守嗣宗會祖副正錫年外祖參判南世健  
也壬辰倭難夫人舉家出避于車踰嶺先坐下一夕  
有數賊來掠村里公之長子郡守公擊斬而梟于路  
上翌朝賊徒大至一村慘被殘屠而夫人及郡守男  
長會郡守妹朴氏婦及其子俱邁害卽其年五月十  
一日也嗚呼痛矣公之內外雲仍甚多今錄其得姓  
而仕者好會孫命益郡守命稷縣令會孫正基判官  
玄孫彥明正言樞官至觀察使男命夔正郎命賚監

役孫廣基知樞會孫彥鐸府使彥璞縣監彥鎰直長  
玄孫漢吉直長漢蕭承旨漢葛佐郎檄官至大司憲  
男命健命岳俱牧使孫學基正郎寂基右參贊拓基  
領議政直基牧使會孫彥欽參奉彥鉉府使彥銖縣  
監彥鏞參奉玄孫漢泰奉事椿孫得基都事進基僉  
樞會孫彥通承旨彥協正言彥翕判官樞官至都承  
旨孫業基庶尹迪基縣監椈官至兵馬節度使哲官  
監役男命雄右參贊命弘判書孫斗基郁基俱縣監  
宇基承旨默基參奉肅基判官會孫彥民承旨樸官  
僉樞男命凝觀察使會孫彥好校理謹敢追記佚事



與後承燒薨埋于壙南以備他日之徵信焉

高祖考贈吏曹參判府君墓誌

公諱大儀字景則姓俞氏慶州之杞溪縣人自羅麗以來冠冕不絕高祖諱起昌僉知中樞府事贈兵曹判書曾祖諱汝霖禮曹判書贈議政府左贊成諡景安祖諱絳戶曹判書諡肅敏考諱泳慈山郡守贈承政院左承旨妣河東鄭氏從贈淑夫人判官顏女參判南世健外孫嘉靖己酉生公少業儒不成名蔭階宣務郎訓諸子嚴而有法最與吳楸灘允謙同研相友善壬辰倭難避寇于庇仁地癸巳十二月二十四

日疾卒享年四十五聘驪州李氏庶尹承緒女郡守鶴孫府使昌寧張應星外孫生先公三歲卒于天啓壬戌正月二十日壽七十七公始厝庇仁東齋宮里僉樞公兆次至是遷奉于楊州下道里車踰嶺底慈山公墓後十許步已向原與夫人合窆四男長好曾文科都事次省曾文科狀元觀察使次世曾文科次希曾郡守三女長適參軍申鉞次適承旨邊孝誠次適僉知孟昭都事三男檄榔稅觀察二男長楳亦觀察使次檄大司憲郡守五男長楮次樞都承旨栳兵馬節度使哲監役樸僉樞檄男命益郡守命稷縣令



孫正基判官曾孫彥明正言觀察男命夔正郎命賚  
監役孫廣基知事曾孫彥鐸府使彥璞縣監彥鎰直  
長玄孫漢吉直長漢蕭承旨漢葛佐郎大憲男命健  
命岳俱牧使孫學基正郎寂基右參贊拓基領議政  
直基牧使曾孫彥欽參奉彥鉉府使彥銖縣監彥鏞  
參奉玄孫漢泰奉事椿孫得基都事進基僉樞曾孫  
彥通承旨彥協正言彥翕判官都承旨孫業基庶尹  
迪基縣監監役男命雄右參贊命弘判書孫斗基郁  
基俱縣監宇基承旨默基參奉肅基判官曾孫彥民  
承旨僉樞男命凝觀察使曾孫彥好校理今爲六世

七世內外雲仍多不可記只書曾玄以下得姓而登  
仕者公嘗曰吾兒有能繼先業者吾死且無恨崇禎  
戊寅以仲男觀察公推恩贈公嘉善大夫吏曹參判  
兼同知義禁府事李夫人亦贈貞夫人墓舊有短表  
而窆銘則無傳焉顧公之潛德懿行必多可書而年  
代已遠乘牒多闕只就墓表及家傳舊聞畧誌而藏  
于壙前庶幾百代之下有所考焉

先妣貞敬夫人李氏墓誌

我先妣貞敬夫人龍仁李氏高麗太師吉卷之後曾  
祖諱士慶大司諫祖諱後山開城留守兩世俱贈吏



知不足齋叢書 卷十一  
曹判書考諱斗岳正言妣淑人全義李氏其考右議  
政忠貞公諱尙真 顯宗朝寓居忠州可興江上以  
李淑人往而生夫人卽戊申六月初一日也夫人自  
幼孝友恭遜無一事違拂長者意與同隊姊妹游戲  
絕未有忿言爭色忠貞公最奇愛之常恨其非男也  
十六歸于我先君是時我王父王母俱下世過十年  
伯父伯母亦已沒而仲母金夫人是冬又不淑夫人  
連生二女俱未育屢經危疾李淑人不忍分離仍置  
傍殆十年而始別居焉然而李淑人早寡素窮窶先  
君自少又不以生業置念家事益旁落夫人獨自辛

勤拮据黽勉有無凡冠服酒食所以奉先君者未或  
後時一告缺也如是者又十餘年而先君始仕夫人  
與受其祿及先君莅四邑而夫人皆隨之一意兢慎  
壺內肅然唯恐一毫浼先君廉政戊戌四月先君在  
清州任所邁疾不幸時拓基從宦不及歸夫人與數  
三族人治斂而躬親含旣殓痛不欲生慮不肖或不  
保強進水漿制除未幾拓基贊价赴燕歸卽梓棘于  
東萊者四年夫人傷離慮禍日夜焦心且於其間經  
紀兩孫女婚嫁教養諸孫憂勤勞悴者至矣乙巳拓  
基蒙恩還朝丙午忝嶺藩始贈先君吏曹參判夫人



知不足齋叢書 卷十  
從授貞夫人戊申拓基錄奮武從勲加贈先君吏曹  
判書夫人仍以正二品行庚戌拓基陞江華留守丁  
巳陞漢城判尹而先君暨夫人贈封則無所增焉明  
年拓基陞判義禁府事加贈先君左贊成夫人亦進  
貞敬又明年拓基猥玷台司又贈先君至領議政而  
夫人仍以正一品行焉夫人見世路日益險時事日  
益艱以拓基冥升不已每授一官陞一階輒惕然憂  
蹙殆忘寢食又必勉之以慎刑罰務忠厚戒黨比賑  
貧窮恤戚故崇儉約拓基忝相府半歲餘譴免退居  
漢湖夫人從之怡然唯幸其不久處權要也夫人戊

戌後雖外除而黻裳素衣三十年如一日時節晬辰  
切不許設饌曰吾何忍獨享也以故拓基四任藩府  
而一未敢稱觴上壽已未 聖上特推孝理朝臣有  
老親者賚以宴需夫人始不得辭而一受之以承德  
意焉癸亥 上聞夫人有疾錫以蔘劑丙寅命給朝  
臣及夫人七十以上食物衣資夫人亦受紬絲米豆  
雞豬之賜又特賚夫人以養老蔘劑其年夏拓基直  
藥院聞夫人疾甚上疏請歸視批諭愍念鄭重仍賜  
相當藥物丁卯秋又以夫人滿八耄特賜紬絲米豆  
薪炭視前歲倍蓰戊辰孫彥鉉以監造官隨堂郎入



侍特詢夫人安否命以所宣果品歸遺夫人已巳春  
上聞夫人疾有加又賜蔘劑夫人每受恩賜輒愀  
然感泣曰 上恩至此何以仰報夫人自少善病老  
而數示憊輾轉沈篤竟以是歲二月二十九日卒于  
漢湖之舍春秋八十二 上聞而驚惻命依 先朝  
故事承旨致吊攸司致賻給擔軍定差員護鞠行葬  
時發丁造墓四月合祔于鐵原芝蕙洞先君墓左夫  
人生二男四女一男卽拓基一女適通德郎尹得謙  
餘俱天內外孫曾俱載先君墓誌夫人性慈仁善恕  
明達周慎往昔治亂國朝故實博聞強記多所通曉

媿媿誦說聽之忘倦至如女紅凡百亦皆蚤成鮮有  
不能常戒年少婦女輩話頭過高又切禁論人是非  
子孫或捶撻婢僕則輒舉陶淵明彼亦人子可善遇  
之語以戒之然其理相嚴而有法內外長幼斬然有  
序毋敢相踰尤謹於祭祀之節臨期庭宇必令掃滌  
庶品必令蠲潔至篤老亦多親檢每令子孫讀小學  
曰由其不讀此書故傲慢非僻皆從此出也常舉先  
代及古賢人嘉言善行以勗之一妹早沒有子貧甚  
凡所以周恤而顧念者殆如已出李淑人喪後有分  
來如干田土而夫人盡以與之喜施予聞親戚窮貧



知不足齋叢書 卷十  
者常爲之惻然傷念不能舉婚喪則必盡力拯濟不  
少吝雖疎遠亦然以故下世之日篋中無錢帛之遺  
餘者拓基臨歸海藩或言平壤饒錦綃可市金冠朝  
服者夫人聞之曰汝旣不樂從仕則不必營此等物  
或值服着又不可借於人乎不如以之移恤於踵門  
貧族拓基遂不敢違也嗚呼夫人德懿之盛雖古所  
稱哲媛不之過也誠恐寢遠寢微謹此畧記納于幽  
隧而神耄識昏未能發揮萬一昊天罔極嗚呼痛哉  
已卯九月朔日不肖男大匡輔國崇祿大夫領中樞  
府事拓基謹誌

咸鏡道都事俞公墓誌

公諱好曾字勉夫始祖俞三宰新羅阿飡其後有諱  
義臣羅亡自以世臣不肯服麗祖怒降爲慶州杞溪  
縣戶長子孫仍爲杞溪人又其後有諱汝諧當崔沆  
擅國作詩譏之竄海島又二代諱僖版圖判書生諱  
承桂亦版圖判書歷三世至諱起昌以武進僉知中  
樞府事燕山朝非理遠謫 中廟改玉屢除官終不  
起生諱汝霖禮曹判書諡景安景安生諱絳戶曹判  
書諡肅敏於公爲曾祖祖諱泳慈山郡守贈左承旨  
考諱大儀宣務郎贈吏曹參判妣驪興李氏庶尹承



緒女公兄弟四人序居長萬曆乙巳中增廣文科丙午選入史館自檢閱轉待敎奉敎歷咸鏡都事又除慶尙都事乙卯正月二十八日卒距其生癸酉享年四十三前配全義李氏父寅凱生二男長檄次榔後配延安李氏父府使晟生一男稅長房六男一女男長命益郡守生正基判官七女婿鄭勸僉樞尹搗朴萬珍沈澳宗室光善君漳趙完璧進士李挺說次命夔正郎出後從叔父忠簡公梶生重基衡基女婿林象台郡守次命稷縣令繼子緒基二女婿金大衡李世命次命禹生丕基胤基女婿朴喬年次命羲生厚

基女婿柳楷次命和以胤基爲後一女適成昌一次房一男命世生舜基顯基緒基季出繼女婿趙宇樞季房無後至今五世六世內外後孫殆數百餘人不盡記噫公蚤釋褐首選名塗崇班華秩宜先於人而不幸遭值昏朝蹇連淹滯佐幕南北遽又早世豈非命哉公之後又甚寥寥嗣玄孫彥明文科官不達止於正言公之沒已一百四十餘年矣乘牒散佚居家行懿立朝事爲未有可攷五世孫直長漢吉要拓基爲誌謹錄先系于上而附後承于下納之幽堂以俟自世之徵焉公葬于楊州乾川面五柳洞已向原與



前配合窆而後配墓在楊州真官面午向原距柳洞十里而近云是爲誌

孺人洪氏墓誌

孺人洪氏系出豐山五世祖柱元永安尉文懿公高祖萬衡校理曾祖重模郡守祖允輔牧使而其考則進士維漢其外祖通德郎尹君得謙吾之妹婿也十五歸于安東金君順行金君仙源文忠公尙容五世孫而參判光炫郡守壽賓副率盛益都正時哲文忠以下四世也孺人旣嫁而夫家遠在湖右未得久侍舅姑嫁才六歲而未及有子女以丙子四月六日歿

距其生丁巳得年僅二十歸葬于洪州五巒山負庚之原都正公過時而猶慟惜之且稱其性旣聰慧儀自端閑又能以禮法自持至如縫裁小節無不精敏早失怙恃欲移孝於舅姑真心眷係而祇恨遠居莫能效其誠也每得舅姑書必敬玩而深藏之常言與婚書必以殉身噫觀於都正公之言可知其賢於人而宜其久而猶不忘也婦人之難得者舅家之譽而孺人則嫁旣屬耳又不能待旬月而能得人之所難得於尊章者豈無以哉斯足以示今與後而又其伯兄樂舜備記其平日言行而終之曰以如是孝友與



知不足齋集 卷十  
識行宜受百福而遽歛以嫁時之衣此何天也其言  
絕悲不忍看噫亦憾矣孺人於吾爲甥孫女自其在  
孩視之無間已出今忽泚曉而誌其壙人事尤可傷  
也是爲誌

議政府右參贊任公墓誌銘

並序

肅廟二十八年壬午春謁先聖取士司饗院僉正任  
公諱墮時年六十三擢第四人人謂公比之陳龍川  
後生叢中出口氣殆過之云四十五年己亥春公以  
滿八十陞嘉善爲漢城府右尹 上入耆社推恩高  
年公亦進嘉義移都承旨夏將錫耆老諸臣宴特擢

公資憲大夫知中樞府事俾與諸老臣同參一時士  
大夫舉莫不聳然相告以爲罕有之異數也 肅廟  
上陟羣壬得志捏誣公遠謫關西旋移中途竟以樞  
歸今 上改紀復官賜祭且命別致祭需太常議以  
勤學好問小心畏慎二法贈公諡文僖嗚呼觀乎公  
之訕伸而世道可推而知也公字大仲號水村豐川  
人自麗至我 朝世有冠冕高祖諱悅漢城府判尹  
曾祖諱榮老宗簿寺正贈都承旨祖諱充承政院左  
承旨贈吏曹參判考諱義伯平安道觀察使贈吏曹  
判書妣商山金氏觀察使尙女公少已聰悟文詞夙



就癸卯進士一等見重士友又遊尤春二先生門下  
俱深期許辛亥除 昌陵參奉序遷繕工監奉事司  
饗院直長司贍寺主簿司憲府監察除黃澗縣監寬  
徭省賦治理大著居三年棄歸士民磨崖鏡清德庚  
申除掌樂院主簿連除雲峰大興不赴冬拜山陰縣  
監釐田政充軍闕十考俱最丁卯爲義禁府都事歷  
刑曹佐郎正郎戶曹正郎尤菴謫耽羅 仁顯后遜  
位公卽棄官己巳尤菴禍將不測公與諸門人叫閤  
痛哭杜門江郊甲戌更化復爲義禁都事改軍資監  
主簿除丹陽郡守洊饑民將盡劉公勸耕檢災分糶

抄飢一躬執不委吏手民久猶追思之己卯任滿遞  
明年除司饗僉正公旣擢第政地適有親嫌久之始  
除成均館司藝拜司憲府掌令有無賴子受人嗾投  
匭言榜中人多考官親屬欲以污一榜盖考官李公  
畚與公爲姻親公亦被指斥命嚴覈並與嗾之者遠  
配公猶不自安差湖西京試官辭求外爲靈光郡守  
土廣而吏猾公剖決如流正名分崇學校未朞大治  
翌年以侍講院弼善召民刻石頌之如黃澗屢爲司  
憲府掌令司諫院司諫一爲宗簿寺軍資監掌樂院  
正選知製教洪公受瀧長銓主激揚言者欲擊去之



又有右言者而助之攻者公並駁正之上亦稱是復爲樂正將進宴期已近而有風雷異又議外宴用女樂公上疏極諫上嘉納並停罷擢承政院同副承旨轉右副會上以癘患彌留忽下釋位之教公繳還聖教徹曉爭執諸公卿伏閣百官庭籲士民陳章歷累日始寢公上疏陳戒請益明義理益究惠澤益建皇極益修政令又言頃者伏閣初日一啓後諸大臣遽罷歸經幄臺閣之臣或在家無一言或事過始封章誠可寒心時人大恚劾公罷之又多詆誣之者明年西敘丁亥除原州牧使戢奸懲豪治化大

行居未幾有大臣引公前疏爲嫌公投紱歸原民刻石頌惠如黃靈焉戊子除密陽府使踰年罷歸公自乙酉最見忤久枳仕塗壬辰始除掌隸院判決事移刑曹參議時有科獄人多規免而公不少撓與長僚窮竟其事自是怨謗愈多癸巳移戶曹參議拜大司諫持平徐命遇歷詆諸公卿公疏斥其情狀上獎以明快特罷命遇職羣憾益深遞歷判決事大司成右副承旨兵曹參議時一番人當路將反科獄脅公女婿李元坤誣引公及仲子以爲證公與仲子就理辨甚晰上教以元坤欺罔巧飾窘態百出公與仲



子俱蒙釋屢除兵禮戶刑工參議大諫承旨錫宴日  
公同者臣領中樞李公濡領議政金公昌集以下共  
十人入參 上下鏤金杯輟法樂令歸宴者社俄除  
都摠府都摠管知義禁府事工曹判書議政府右參  
贊累章乞休致不許公精力老而不衰知申日例兼  
藥院直宿診候四十餘日無所懈後又鎮日起居雖  
寒暑一不告病辛丑八月與諸公卿三司入對贊定  
建儲大策賊臣鳳輝投疏熒惑意叵測公又與諸公  
卿一辭請討是冬賊臣一鏡等上急書時事一變諸  
大臣爲禍首壬寅春逾豎虎龍上變起大獄諸大臣

皆不免以及於舊臣宿將其禍之慳古未有也先是  
錫宴後與宴諸公議繪畫作帖分藏侈盛事而公以  
有司堂上主其役患無財力有徐允興者請貸西閩  
銀納其息公遂成給公移而取子錢以需用事在庚  
子四月至是誣獄興允興貸銀時任保者鄭宇寬名  
出囚供按獄者提問允興而無其實則臺臣請令本  
道鈎覈平安觀察使李真儉查啓言簿牒昭昭無可  
疑然而時輩必欲甘心公更逮允興酷訊六次無所  
得於是計無聊臺臣乃謂耆所關文任某所署而宇  
寬實受其帖况其銀貨終歸爛用幾逞凶圖請竄公



知不足齋叢書 卷十  
極邊夫受帖者允興而勒謂以宇寬貸銀之爛用諸  
供所無而架虛粧撰唯其意當時獄案臺議之白地  
誣罔皆此類也遂竄公于咸從府明年大旱疏決命  
量移言者又尼之甲辰夏始移于金川郡公久傷於  
西塞風土至是益沉緜七月十九日卒于謫所壽八  
十五公疾病安閑如平日卒之夕謂侍者曰莊生言  
死可樂而生爲勞信乎無一語及私方當老炎淫潦  
將斂顴頰華潤無瘳氣人皆異之始厝高陽戊午遷  
窆于金川郡北陵谷負艮之原前配黃州邊氏郡守  
命益女繼配廣州李氏府使命聘女俱有婦德封贈

俱視公俱祔公墓前配出一男鼎元僉正二女適士  
人李以榮趙文煥繼配出二男崇元副正行元府使  
四女適士人朴弼稷判書洪鉉輔縣監李元坤士人  
金鎮崙側室男碩元折衝女爲尹惟善妾鼎元二男  
長遜天次遜縣監女適金慶祖崇元女適府使李徽  
之無男取弟男邁爲後府使行元二男長邁正郎次  
邁出繼女適參奉李運承李以榮男東煒東炳東遇  
東賢女婿宋秀華參奉朴弼稷繼男師虎洪鉉輔男  
鳳漢右議政三女婿李德重副提學李彥衡承旨趙  
曦觀察使李元坤三女婿金厚澤監役尹某尹某金



鎮崙男茂澤女婿李秉咸內外曾玄男女五十餘人而洪議政有女冊我 世子嬪誕 王世孫公疎朗清高如瘦鶴古栢坦夷絕畦畛敬愛父母一言一事未或違拂事伯氏如父季弟早沒取其子教育如已出及夭而有稚子女又撫養而成立之老而奉三世祧廟備物蠲祀薦獻必躬自少甚嚴於淑慝之分直道而行無所撓奪義所當爲未嘗疑顧以是積被怨嫉屢致顛躓九耄遠謫見者皆涕而公夷然如常日家人欲紓憂迫一往見當路人公遣書大責曰使我死於此何妨而汝忍爲此也聞之者爲之爽然公雖

不喜修飾而少嘗隨先公於西南大藩聲色紛華一不爲所移居常不以家事經意六典州邑無一區宅臧獲無所加唯耽書哦詩手不停披蕭然有出塵想最好易論語老猶諷玩不厭爲詩清新雅健文亦辭理條暢所著詩文若干卷又有論語聚分史家割榮選文掇英詩乘歌行六選唐雅等書並藏于家拓基以眇然後生猶幸屢拜公床下竊覲公襟期之恬遠氣度之清介誠非今世人所及至今四十餘年追思邈然殆不可以復覩矣前旣撰公狀論太常今又掇其大述幽誌系以銘銘曰



任際麗代肇籍西河縣縣蟬赫赤芾青綯竹厓及公  
五世高科公姿貞粹裏剛色和公材蚤成藉甚詞華  
丹鉛甲乙其書滿家省闈偃蹇民社婆娑翼奮澠池  
鯤化溟波直道自信孤忠不阿繩愆弼違糾慝排邪  
羣咻衆怒積困詆訶 聖主知臣異眷彌加一堂需  
雲黃髮鬢髣流傳盛事百代堪誇軒龍墮弓合窳磨  
牙燎原劫火彌天密羅公豈獨免公其奈何魂招鵬  
舍恨結楚些 离明繼照睠舊興嗟賜酌易名新渥  
滂沱我銘幽隧用眎無涯

仲子婦淑人沈氏墓誌

淑人沈氏系出青松 本朝青城伯德符之後累公  
累卿奕世蟬連其考諱宅賢行吏曹判書妣 國姓  
李氏成均進士贈左贊成漢翼之女十五爲俞彥鉉  
妻癸酉十月二十四日以蓐疾沒于彥鉉之龍仁官  
衙得年僅三十九生五男八女一男漢容出爲彥鉉  
兄之子旣長而娶僉正趙榮克女二女嫁士人李瑗  
李澤模俱夭而無育一女方十歲其餘四男五女俱  
不育淑人姿美而端性又明惠婉柔且以其晚出而  
最見愛於父母也自幼已能絕不作嬌癡態未敢爲  
惰容傲戲及入吾家一心洞屬過二紀如一日長者



有言則雖微事未或少違新至吾戲謂其髻飾雄黃石稍大則卽日解去終身不復用與之爲娣姒妯娒者共七人自不無底蓋方圓之異而惟以恭遜讓於人爲主未嘗有一言失平或有情外之言亦不肯自辨曰無益徒紛紜耳貞固有精神雖當滾急蒼黃時猶能不失常度喜安靜而厭熱鬧尙簡約而惡汎濫寧甘於狷介不弘不欲以能幹自居隨其夫之兩邑日用例入外雖醬醋瑣細未敢擅自取納不信巫覡祈禱雖疾病危厄之際一不令近門庭篤於孝自失所恃哀慕久而不衰夜輒夢夢輒涕泣病革語其夫

曰平日不能盡子道於舅姑今將反貽慘憾不孝大矣嗚呼以如許資性旣未能享有壽祿又多失男女天理神意已未可度思而爲其舅姑者之慟惜傷怛又曷有極哉以其年十二月權厝于龍仁防築洞丙向原將擇地移窆而未及焉其舅爲誰杞溪俞拓基原任領議政致仕年今七十二矣垂涕泚筆而誌之于壙後之人尙有以知其賢而哀其命勿毀其葬也

成均進士李君墓誌銘

並序

李君士盛長余二歲與余居同里自余十二三已相識朝夕源源後雖多聚散離合而每相逢輒相欣然



兩忘所趨者蓋六十年如一日今士盛沒而其孤乞  
余銘其幽噫其悲哉士盛諱昌鎮士盛其字爲人寬  
厚謙約孝友惇睦奉祭克其誠老猶不懈喜施與甫  
十歲出游見隣兒呼寒脫新紬襖以與之後兒之母  
來謝于家家人始知之嘗在鄉值大饑約已取贏以  
賙之鄰曲多賴而不死亦有感其義終身願爲僕者  
向人無所求不喜談人長短然而嚴於淑慝之辨雖  
盛暑不脫巾襪未嘗終日偃臥接人無表襮一見可  
知爲真實長者少受業圃陰金先生頗被獎許力攻  
功令家言累發解居上游不利南省晚始登司馬銓

中屢注官亦不做好游覽山水金剛雪嶽以及湖嶺  
足跡殆遍嗜書史至老不去手喜吟詩凡牢騷不平  
一於詩發之合成累千篇瞻暢多可誦癸未十一月  
初一日疾卒壽七十五其先星山人高麗文烈公兆  
年之後我朝領議政稷星原尉正寧左贊成諱吏  
曹參判彥忠尤大顯高祖諱廷美贈承旨曾祖諱光  
遇贈參判祖諱碩輔同知中樞府事考諱奎徵通德  
郎妣濟州高氏學生處大女君墓在安山水多洞壬  
坐原與前後配合窳前配潘南朴氏通德郎弼仁女  
後配光山金氏學生澱女俱有婦德朴氏無育金氏



知不足齋集 卷十  
舉二男得源達源得源二男箕采箕來二女長適沈  
商鎮次幼達源天無子以箕來爲嗣側出三男承源  
順源繼源三女長適吳洙源餘俱幼噫方君壯時與  
吾輩十數人者頡頏磨厲不相下若將以有所爲而  
其十數人者或天沒不成名退藏不求聞而又往往  
有歷臺閣或卿宰雖不第而登仕版任縣邑君獨坎  
坷僅以一上舍終焉豈其材與志不及其人哉獨其  
命之不如耳然而其人之壽之僅及君者若而而不  
及君遠甚者尤多是知箕範五福必以壽爲首者有  
以也君其奈何乎哉抑將嗇於躬而裕於後歟銘曰

既有諸已奚命否舍用莫試藏厚地將後可貴庶自  
慰揭茲恢偉增嘯唏

成均進士贈左贊成俞公墓誌

京畿高陽郡治之西五里佛巖洞我七世祖禮曹判  
書景安公始葬焉其左一麓卽景安公第二男府使  
公及其所後男進士公族位之地也我俞氏系出杞  
溪歷羅麗至我 朝冠冕相望成均進士贈吏曹參  
判諱解僉知中樞府事贈兵曹判書諱起昌卽景安  
公兩世而景安公諱汝霖府使公諱縝無育取其弟  
戶曹判書肅敏公諱絳次子諱涵子之進士公是也



字德容嘉靖丙戌生十八成進士仍治經學屢試竟不第人或勸之仕笑而不應萬曆辛巳十月五日疾卒春秋五十六後以諸子從勲屢贈至崇政大夫議政府左贊成前配廣州安氏牧使漢俊女參贊潤德孫舉四男一女後配平昌李氏郡守希賢女判書季男曾孫舉二男一女俱從贈貞敬夫人俱祔公墓男大倣監察大脩文科府使大倣文科郡守大儼効力副尉大倣僉正大佑監察女婿郡守金滋領議政沈悅庶子大伸大伸大儉大倣大倣而大儉同知至今七世內外子孫甚衆只書其得姓而有官者判官孝

曾守門將貴曾院正學會縣監勉曾主簿後曾縣監得曾參奉養曾孫行也監察檣虞侯楠縣監黎參判榮監役棐曾孫行也縣監命諱校理命胤佐郎命哲府尹命一正郎命興監役命擇玄孫行也參軍鼎基縣監泰基縣令相基知中樞億基郡守夏基府使一基兵使胄基參奉壽基五世孫行也牧使彥哲郡守彥徽縣監彥宗參奉彥質縣監彥容參判彥述府使彥摯正郎彥肅五衛將彥慎六世孫行也監察漢喆直長漢鼎郡守漢輔縣監漢膺七世孫行也噫公旣妙齡登司馬且勤於舉子業則其必顯敷當世光大



家聲而命之不偶終未大闡亦不肯屈首蔭塗仍遂  
湮沒重可恨也然而子姓既繁科宦相繼恩贈貳公  
榮賁泉塗斯足以見天道歟公之世已遠中經兵火  
家牒無存志行之懿無所考据彥述等俾拓基畧識  
于幽壙云

敦寧府都正趙公墓誌銘

並序

余嘗爲觀我齋趙公宗甫誌其夫人李氏墓居未幾  
宗甫又卽世其孤復丐余銘余何忍辭余與宗甫少  
小居比隣朝夕相追隨甚相驩至老而不衰也宗甫  
自幼穎悟絕人心目所到學之無不能稍長學于良

菴李文簡公喜朝藝業日進士友莫不推許癸巳成  
進士戊戌筮仕爲 章陵參奉所踐歷內則司饗院  
奉事尙瑞院 恭陵直長掌苑署別提司憲府監察  
濟用監司僕寺典牲署主簿義禁府都事 宗廟署  
令戶曹刑曹佐郎刑曹正郎司饗院司導寺僉正廣  
興倉守外則燕岐堤川積城宜寧安陰縣監白川郡  
守丙子以 東朝寶算七旬推恩中外公亦陞通政  
階拜僉知中樞府事再除敦寧府都正辛巳三月二  
十七日疾卒壽七十六穿夫人墓合葬于坡州游山  
里負艮之原公諱榮祐宗甫其字也系出咸安爲國



著姓九代祖諱旅號漁溪 端宗朝與梅月諸賢同志同傳七代祖諱舜吏曹參判卽戊午名賢高祖諱毅道主簿贈參判曾祖諱鎰署令亦贈參判祖諱逢源同知中樞考諱楷郡守贈參判妣晉州姜氏參奉諱游之女也公性剛而氣清志高而行修綜理微密尺度謹嚴居官居家自有一副當規模早失怙恃含恤終老語及輒泫臉祠版奉於異宮而薦享之節情文兩至事兄姊如事父母教子姪嚴而有法其莅職不苟近譽事上臨下一任惻愍主於廉簡而文以儒雅慈祥惻怛務盡人情以故所至雖無赫赫聲而輒

有去後思晚節嘗曰人有四大欲生也色也宦也財也此四者人人皆可戒而仕者尤當銘念余故從宦二十年夙夜兢懼而今而後庶幾知免矣此其平生律已大致而尤嚴於出處之際當壬寅士禍伯氏留守公亦被謫時以直長匪久當陞六品而脫然棄去在外邑心有不樂則亦輒謝歸在宜寧時該曹以重摹 光廟御容而公之善畫承 上命發關召之乃曰卽如此與畫師何異匪其招不往古之義也堅坐不赴旣被逮將重究有爲之地者欲遲待胡赦恥之力求速勘竟削職戊辰摹 肅廟御容 上令入參



知不足齋叢書 卷十  
監董公曰只監董其事堂郎一也何嫌焉及入侍筵  
臣有言執筆無不可 上問汝能執筆爲之乎辭教  
委曲而力辭曰執技事上著之禮經不與士齒臣雖  
賤豈可自同衆史污辱衣冠乎 上爲之色變屢加  
呵責然亦未之強也自後 上臨筵語及輒稱其介  
潔名入注擬必爲之批下以白川時事墨文網徒配  
旋褒以觀過知仁而特宥之蓋前日筵對剴切始雖  
忤旨終亦以此見知云爲詩文逼古而絕陳俗筆亦  
適逸自成一格晚益專功朱書看閱不懈然此不足  
以槩之也雅意林泉不汲汲於榮利之觀雖黽勉祿

仕低回冗散而常閒居無事輒指心而歎曰我負師  
友多矣甚矣口腹之累人也其志趣所存可知也每  
未明而起夜分乃寢掃除蠲潔一塵不留几案圖書  
位置秩然竹簷花塢嘯咏自適望之如畫圖中人而  
非烟火家計也嗚呼悠哉夫人延安李氏其考縣監  
賀朝卽良菴之弟而靜觀齋端相之子也舉三男三  
女男長重希次重晄以孝旌閭俱有才而天俱無子  
取族孫寬鎮爲重希後次重瞻有子女俱幼三女婿  
長進善洪啓能次參奉金頰次觀察使李潭進善有  
二女幼寬鎮男濬銘曰



六邑之政不可謂不試緋玉之列不可謂不顯嗟觀  
我生平志業曾奚足以少展惟其貞固之操精明之  
識今之世未易復見刻銘以示來許老淚爲之一濺

幼孫文達壙誌

杞溪俞彥鈐娶申氏生首子其祖漢湖翁接而命小  
字日文達蓋愛其秀眉洪音風骨不凡祝以顯門戶  
也甫八月得驚癘疾以辛酉四月二十三日死翁哭  
甚慟瘞之楊州車踰嶺內先兆書麓納于壙斲後之  
耕犁者之見而哀之而勿踐毀也翁之名曰拓基  
知守齋集卷之十



